




LE

O
A

VITT. EMANUELE III







NFERTA PE LO CAPODANNO

1843.

ROBBE VEGGHE

NOVEGNE

E NNOVE DE TRINGA

INFERTA PE LO CAPODANNO 1843

DI

Giulio Genuino.



NAPOLI

STAMPERIA E CARTIERE DEL FIBRENO

Strada Trinità Maggiore N.° 26

1842

FONDO DORIA

964051

IX 13



A CCHI VO' CANOSCE LO PPECCHÈ,
LO CCOMME, E LO CQUANNO.

ANTECIPAZIONE.

NE, mio signò, faciteme razia, che bbò dì sto tritolo a spacca-strommole? Che ssò ste rrobbe vecchie, e nnovegne che nce volite abbarrucà pe Nferta de lo Capodanno? Già nnuje n'avimmo voglia de spennere no piatuso pe sse gghiakovelle. Ma si lo demmonio nce volesse cecà de jettarce qua ccarreniello, volimmo sapè primmo de che se tratta. Mo cchiù non se pazzeia a nnasconnere. A lo secolo de li lume, lo Pprubbeco nce vole vedè chiaro, e llampanno. Uscia mine ntenne?

Accossì n' alletterato de chiazza, sbruffan-
nome nfaccia lo fummo de no sicario, mm'ad-
dimannaje cunto de lo cartiello che io aveva
fatto azzecchè pe le mmura de Napole, mmiezo
a le Ppartenze de li vapure, a la Sarza Pareglia,
e a li Pataffie de li Triate. Ma io, co na resatella
a bbavone, lle responnette : carta canta ncan-
nuolo; chi stampa, non parla, e lle votaje le
spalle.

A bbuje mperrò, Signore mieie, songo in
obbrego de ve levà sta capacità, sì nn'avite
golio. Ve lo mmeretate.

Avite a ssapè che, quanno mme n'è bbe-
nuta la nziria, aggio mpacchiato certe com-
poste acro-doce a llengua nosta, che se songo
sprubbecate pe ddevozione dinto a cchille
giornale che cchiù vanno mpoppà, e gghio-
cano all'aumento. Nconseguenzia ste ppovere
crejature songo jute sperte, e ddemerte,
senz'avè no muorzo de casa propeta pe se nce
arrecetà tutte aunate, e mmostanno a rriseco
de morì de morte gnagnolla. Le mmale len-
gue, che mbrosoleano da dereto, hanno fatto
fuorfecefuorfece, e mm'hanno taccariato pevo
che non se fa de chille patre senza coscienza

che mettono li figlie a la Nunziata. Chesso po non bà buono. Io perzò pe n'avè sto taglio de faccia, e ssapenno che ste ccrejature non songo de casa sposeto, pecchè portano scritto nfronte lo nomme de lo patre lloro, e sse ponno stirà la cazetta nfì a ncanna, aggio pensato de lle fravecà n'asilio, addò metterle nzieme, azzò se volessero bene comm'a ssore, e potessero trovà quacche ncappato che lle squaseia.... E bba te corca! chi vuò che perda lo tiempo appriesso a le bbecchie?..

Mm'avite na scoppola; ma io perzò mmiezo a le becchie mmesco porzì le nnovegne, e le nnove. Vuie già ssapite che se chiammano novegne le rrobbe a malappena ausate. Pe n'assenpio: no sciallo puosto tre o quattro vote, che na signorella se venne, pe ffarse la mozzetta a la moda; na vesta da poco ncignata che se derrupa pe nn'avè n'autra co la rota abboffata; le scarpe strette che se mannano a la reforma pe ccausa de li calle a li piede, e bbaie scorrenno. Cheste ccà se chiammano rrobbe novegne, non già chillo cappotto vecchio, e ssedunto che no zio mannava a rrialà a lo nepote, pe ffarle fà n'abbeto nuovo.

E ccossì comme ve steva decenno; io tengo porzì na quantetà de scartoffie che chiammo novegne, pecchè non sò state poste nsoppressa sotto a li trocchi, ma songo servute pe l'amice che mme l' hanno addimannate pe ffa qua ccomprimiento a cchiacchiare pe lo nomme de le Ssignore, o pe la nasceta llo. E cheste penso de farle stampà nzieme co le rrobbe vecchie, mmescannoce pe cannarutizia purzì qua ccosa nova de trinca! Ve persuade la pensata? Si non ve quaglia sarrà ddesgrazia de lo supprecante. Co tutto chesso non me perdo d'anemo. A lo mmacaro non me potete renfaccià d'averve mancato de parola. V'aggio fatta la Nferta, e ssi volite siscarme, ve l'avite d'accattà primmo, p'esse jodece competente. Accossì pe stuorto, o pe deritto farraggio lo fatto mio, senza paura de refonnerce lo spesato. Sta regola vale pe ttanta speculature, e non credo che aggia a ffallì schitto pe lo

Schiavottiello vuosto
GIULIO GENOINO.

N' AUTO TRASCURSO

*Annodacato ntra Sabatella Pepitola,
e lo si Vicienzo lo Postiero.*

Vic. (ntra isso) Mm' hanno ditto n.° 13. Vico Schizzitiello. Chisto è lo Schizzitiello; ccà sta lo numero 13; ma llà ddinto non mme pare che nce sia la commare...

Sab. (a pparte) Nè! sto sporteglione, che bbà ronnianno pe ccà ttuorno, chi è?

Vic. (c. s.) Vedo na capo de femmena, ma chelle ddoje farbalà de capille che ttene pe ncoppa a le rrecchie nfi a ncanna, s'hanno arrobata la filosomia! Non borria fà qua sbaglio... e passà pe chillo che non songo.

Sab. (c. s.) E ttorna a smiccià! Che scostumato! Non me leva ll'uocchie da fronte.

Vic. (c. s.) È quase scuro... allummasse ommanco no lume!..

Sab. (c. s.) Vì a cche simmo arredotte nuie aute povere scorfanelle! Manco dinto a le ppoteche potimmo sta cojete!.. Ma mo te l'ac-

**

concio io sto vecchio schefuso... (*se sose da la seggia*)

Vic. (*c. s.*) Iesce da lo bbancone, e bbene da chesta parte...

Sab. (*a voce auta*) Nè, mio Signò, tu che pretienne, che buò da ccà? Va vattenne; ca sì nò te faccio rompe le bbraccia.

Vic. Uh! chesta è la voce soja!.. Ll'aggio canosciuta... Commà Sabatè?

Sab. Nescia me! lo compare! Comme tu, si tu?

Vic. Gnorsì, songo io... Mm'aje fatta st'acoglienza, commà!

Sab. Scusame: aggio pigliato no rancio.

Vic. Ed è stato fellone.

Sab. Va va, non ne sia niente cchiù. Viene ccà; asettate.

Vic. Mille grazie. (*s'asettano*)

Sab. Mm'aie da compiatì, frate mio! Da cinc'anne che non t'aggio visto!.. Pecchè non trasive, e zitto?

Vic. Si t'avesse canosciuta? Ma, commare mia, scusame si te lo ddico, tu tiene no punto de faccia; nc'aje puoste attuorno cinco ottave de zirole...

Sab. Non te piace?

Vic. Arrassosia! Ssa pettenatura mm'ave acciso a patemo.

Sab. E pecchè? Chesta è ll'urdema moda.

Vic. E ttu porzì parle de moda! Uh! mezacanna bbenedetta!

Sab. Compà, tu mm'affienne parlanno a schiovere de ssa manera. Oh! ccancaro! Sò na negoziante de genere, e non pozzo ghia la moda?

Vic. La moda lassala a le ddame de qualità, a le ssignorelle de petena.

Sab. Se vede che staie scarzo a nnotizie. Nprovincia sì addeventato no zammaro. La moda pe nnuie è lo quinto alimento. E bbuò vedè si n'è bbero? Io mo nne tengo rrobba jettata dinto a sta poteca! E addò cride che stia tutto lo concurzo? A la mantechiglia. Non c'è zellosa che non se n'accatta no tornese lo juorno pe s'alliscia le ppennate de li capille ncoppa le rrecchie. Tu vide certe sbrenzole co le ssarcenelle sotto lo vraccio, la nzalata e l'agliaro mmano, mpazzì appriesso a sta moda! Lo ppagne se fanno mancà; la mantechiglia gnernò!

Vic. E cchesso che ddice, va contro de te. Che ddiaschece? Na mercantessa non se vrìogna de pettenarse comm'a le bbaiasse, e le sbrenzolose?

Sab. Quanno le ddame nce passano pe ccoppa, pozzo contentarme io porzì... Ma non toccammo sto tasto, ca nce desgustammo, compà Viciè. Parlammo d'auto.

Vic. Parlammo d'auto. Dimme no poco. Tu cinc'anne arreto facive la professione de stira-trice, comme va che te truove aperta poteca?

Sab. Mo te conto. Na bbona signora che io stira-va, sapenno ll'onestà mmia, mme volette ajutà.

Vic. E comme?

Sab. Lo marito ave posta na bbella frabbeca de tela, de magramma, de percalla, de papariello, de moccatore, e mme ne dà qua scam-polo ncredenza, pe ffarlo vennere a minuto a la ggente cchiù sfasulata; pecchè sta robba, mo costa tre prubbeche. Lo niozio corre, e co cchello che mm'aggio guadagnato nce aggio agghionta na capitania de ggenre coloniate, comm'aghe, spingole, lazze, saponetto, mantechiglia, sciammifere, e bbaje scorrenno.

Vic. Ebbiva! mme ne rallero. A sti tiempe le flemmene nnustriose fanno sempe fortuna!

Sab. E tu pure, compa Viciè, te si no poco allostruto.

Vic. Gnorsì; dinto o lo fferro.

Sab. Mmara me! dinto a lo fferro! E ccomme?

Vic. Aiè da sapè che quanno io era postiero, pagaie no gruosso terno a n'accunto de la poteca. Chisto era n'ommo accorto, e politeco. Ncagno de nne fruscià lo denaro de la venceta,

lo gghiettaje dinto a lo fierro. Se nne jette nprovincia, pe nn'apri n'officina, e mme nce portaje pe contabilo.

Sab. E lle jette mpoppa lo niozio?

Vic. Vi che ddice!.. S'è ffatto riccone. A mme ppape che lo secolo dell'oro fosse pe li pezziente. Nce voleva lo secolo de lo fferro pe te fà mprofecà le ccase, e li regne. Na vota se diceva, meglio l'arrusto che lo fummo. Mo lo fummo te dà l'arrusto. La Nnustria, che te scioscia sotto a le ccaudare a bbapore, te cagna la faccia de lo munno. De lo fferro te nne fa na pasta frolla, e tte lo llavora co mille ngiegne, e mmarcangiegne p'abbelli le ccità, e pe ddà sfizio, e ppape a li citatine. T'avasta dì, che io tornanno da la Provincia aggio passato li sciumme pe ccoppa li ponte de fierro. So sciso nterra, e ssò bbolato pe la strata de fierro. So trasuto a Nnapole rente le ccarcare de fierro. Napole non se conosce cchiù da chi nce manca da quatt'o cinc'anne. Lo fferro l'ha bestuto comm' a na zita novella. Quanto se nn'è gghiettato a lo Peliero per guarnizione de la marina, e dde la Dogana! Quanto se nn'ave agliottuto, e ss'agliotte l'allomenazione a grasso! Quanto se ne consuma pe li triate!

Sab. Che robh'è! Li triate fuorze se sò ffatte de fierro?

Vic. Si non se songo fatte; se faciarranno. Chiammale ca sò bbenute. E bbenerranno pe mmare porzi le ccase de fierro comme già so arrivate li chiano-forte-de fierro. Pe mmo li triate ne fanno gran consumo pe le bbatterie de cucina. Ogne artista ave da esse armato a rrasulo pa fa mprofecà lo spettacolo. D'abbete a ccarattole se nne pò fà de manco; ma de sciabole, spade, cortielle, sfarzine, palosse, scoppette, pistole, gnernò.

Sab. E pecchè?

Vic. Pecchè, sore mia, ogne nsera ncoppa a le scene hanno da morì accise cinco o se perzone pe l'adificazione de lo prubbeco; e ppe ddà viento e l'abbijata a l'atture.

Sab. Oggi è sapato! Leva lé; che mme vuò fà torcere?

Vic. Se vede che non aje ll'anema de fierro pe sseguità lo progresso.

Sab. Tutto appriesso a lloro. No no, meglio a la casa, a la taverna cchiù priesto, che ghirme a gnettechì lo spireto. Ma parlammo de cose allere. Ne, compà, s'è lleceto, comme stammo a firelusse?

Vic. Non c'è male. Mm'aggio puosto no poco

de paglia sotto. Mme so' rreterato a Nnapole
co la ntenzione de mme mpiagà lo denaro.

Sab. Mpiagarlo! Non te lo consiglio. Si è ncop-
pa la rennetta, te vene a lo quatto e mmiezo pe
cciento. Si è pe mpriesteto, miettece nomme
penna. Te lo truffano, e nce refunne lo riesto.

Vic. Mme potarria accattà na casa. . . .

Sab. Pevo; pe l'accommete nce spienne lo tuppo,
e ppò li pesonante non te pavano. . . .

Vic. Aie raggione.

Sab. Nconfidenza, a quanto saglie lo butto?

Vic. Credo che arrive a no cincociento ducate.

Sab. Compà Viciè, e ccome sì porpetta? Co 500
ducate non t'accatte manco no vascio. Sa che
buò fa? Negoziatille.

Vic. A ttant'a carrino?

Sab. Mmara me! . . . E la coscienza?

Vic. Non ce aveva pensato! La coscienza pe
nniente nce scappa da la mammoria.

Sab. Vuò fa na cosa? Miettele a frutto co cchillo
frabbecante de Sora. . . .

Vic. Sai ca dice huono? . . . mma io non lo canosco.

Sab. Lassane a me lo pensiero. T'e ccaduto lo
maccarone dinto a lo ccaso.

Vic. E ccomme?

Sab. La mogliera de sso frabbecante, a lo mese
che trase vole fà no viaggio a Ssora pe bbedè

lo marito, e bbo portare a mme pure. Tu mme daje ssi 500 ducate. . .

Vic. A tte! . . . E non sarria meglio che io venesse co'bbuje? Sò no proprietario, capitalista.

Sab. Nce lo bboglio dì a la signora: spero de quaglià lo niozio.

Vic. E io lle farraggio da ciciarone.

Sab. Pecchè? nce sì stato a Ssora?

Vic. No; ma nne saccio parmo pe pparmo la strata. Io l'aggio letto dinto a no Viaggio stampato a llengua nosta. . . quatt'anne arreto.

Sab. E quanno è chesto, lassemence parlà...viene me trova, e te darraggio la risposta.

Vic. Ebbiva! Cheste se chiammano commare!

Sab. Va, vattenne; vè che s'è ffatto notte;

Vic. E cche paura nc'è? Mo a Nnapole se cammina meglio de notte che dde juorno. Ognestrata pare na galleria! . . .

Sab. È lo vero, è lo vero. Beneditto pozz'esse chi nce fa tanto bbene!

Vic. Ammen. Donca accossì restammo.

Sab. Accossì restammo.

Vic. Bona notte, cominà.

Sab. Bona notte-A rrevederce.

Ccà fernesce sto filaccio, e io pe ffà na finezza a sti viaggiature, lle dongo p' antepasto chello che bene appriesso.

VIAGGIO A SSORA



SESTRINE

Pe no guajo che se passa, e non se dice
 Io mm'era comm'a lluppeca arreddutto;
 Uno de chille che sò bbere amice
 Quanno mme vedde accossì giallo, e brutto,
 Pe ffà cacciarme la paturnia a mmonte,
 Mme facette spassà comm'a no Conte.

Mme mosta oje lo Peliero, la bbanchina,
 La strata nova, ed altre ccose belle:
 Ncoppa a la via de fierro crammatina
 Mme porta a ffà volà senza l'ascelle:
 E llà mme sento allarià lo core
 Da la puzza che gghietta lo vapore.

Le flemmene le ccruce se facevano
 A bedè corre sulo no paiese,
 E nfra de lloro, leva lè, decevano,
 Nc'è ddinto qua ddejavolo franzese;
 E nn'avevano po difficordà
 Da lo diavolo a ffarse strascenà.



Ma tanno fuje pe mme n'acqua de maggio
 Quanno ss'amico me portaje pe ffora
 A ffà nzieme a cciert' altre no viaggio
 Pe San Germano , e ll' Isola de Sora ,
 Co na bella carrozza de Maldura ;
 Ca chi va mposta fa n' altra figura !

Pe non ce carrecà troppo de spese
 Eramo cinco dinto a ssa carrozza ,
 Frugulo , Donn' Urbano , e lo Marchese ,
 Don Michele , e sto tallo de cocozza ;
 Cossì pe stuorte , dritte , e bbonemane
 Ogne carrino nce venea doje rane.

Lo marchese è dde n' ottema morale ,
 Nè dde vigilia vò magnà de grasso ,
 A nnisciuno è capace de fà male ,
 E pe ccura se piglia quarche spasso ,
 Ama la compagnia , nne sape ll' uso ,
 Ma è no poco apprensivo , e scrupoloso.

Verbirazia , non manca d' appetito ,
 E sse pecceja lo mmagnà , magnanno ;
 Chesto lle fa sagli 'ncanna l' acito ,
 Chello lle fa venì mpietto l' affanno ;
 Ha ppaùra de l' uoglio , e dde lo strutto ,
 Ntratanto se lo scorda , e magna tutto.

Vuò sapè Don Michele ? È n'avvocato
 Che quanto tene 'ncore , tene mmocca ;
 E pecchè lo deritto ha studejato
 Dice la veretà quanno l' attocca ;
 E nninche piglia suonno , te dà spasso
 Co no runfo de cuorne , e contrabasso.

Donn' Urbano nò stà buono a ccasata ,
 Ma te fà de Signore l' azzùne ,
 Smania spisso de fà qua ccampagnata ;
 Joca ogni nsera ; manco li spontune
 Da chella seggia lo potriano smovere ,
 E tte fa sempe mediatore a schiovere.

È Don Luigi Frugolo no vero
 « Desperato p'accesso de bon core »
 È tutto afficiuso , e facenniero ,
 S'accide pe ddà gusto , e ffarse annore ;
 Ma pe na certa soja mala fortuna
 Le sbaglia tutte , e non ne ngarra una.

De me che v' aggio a ddi provita vosta ?
 Sso tasto de toccà non me commene ;
 D' esse no mala fercola non costa ,
 Non me voglio mpattà p' onimo dabbene,
 A la Modestia pe non fà dammaggio....
 Donca è meglio parlà de lo viaggio.

Partimmo all' arba co lo tiro a cquatto ;
 E io mm' accedeva a ghì guardanno attuorno
 Chi me vedesse , e cchi mm' avesse fatto
 Lo musso stuorto , pe lle fà no cuorno ,
 Ma a cchell' ora non bide trafecare
 Che ppezziante , ovaiole , e berdummare.

Arrivate nfi a Capua 'nsarvamiento ,
 No cierto ch' a la Posta era mpiagato ,
 E nce voleva fà no compriminto ,
 No diggiunè nce aveva apparecchiato
 De funge , aulive , chiapparielle , e nnuce ,
 D' ammenole , confiette , e ccose duce.

Ma comm' era vigilia chillo juorno,
 E ll' ott' onze scassà non se potevano ,
 Accossì lo Marchese ll' uocchie attuorno ,
 Votava stuorte a cchille che nce devano ;
 Io , che lo singo non passaje , mm' anchiette
 Però na meza sacca de confiette.

Po nce ne jammo dint' all' Armaria
 Ch' è na cosa magnifeca a bbedè !
 Vintidujemilia piezze , e nn' è buscia ,
 Nce ha nzajate lo Genio de lo Rrè ;
 Quase pe nciarmo sguigliano le ffile
 Da ccà , da llà , de sciabbole , e ffucile.

Ma è ttardo ggjà; lo postiglione tocca ;
 Li cavalle se magnano la strata ;
 Vedimmo lo Vortunno addò se mmocca ,
 Lo campo addò manovera ll' armata ;
 E ll'uocchio danno a cchesta parte, e a cchella
 Arrivammo volanno a Ttorricella.

Nninche pe Conca pò la via se piglia
 Chi a lo stommaco sente no languore ;
 Chi miezo s' appapagna , e chi sbadiglia ;
 Chi caccia lo rilorgio , e guarda ll' ore ;
 E io , che tengo la famma de no bruco ,
 Qua confietto m' ammocco , e me lo zuco.

Ma tutto nzieme tanto d' uocchie arapo ,
 E bedo nn' auto nn' auto no gran Monte
 Che se trasporta no casino 'ncapo ,
 E quase 'ncielo vò mpizzà la fronte !
 Nce vò poco a ccapire sto latino ,
 Casino , e mmonte fa Montecasino.

Gnorsì , mme l' allicordo , lo canosco ,
 Responne lo Marchese , ma toccammo ;
 Avimmo ancora da passà no vuosco ,
 Si no, dinto a qua guaio cierto ncappammo.
 E cche paùra ? Disse donn' Urbano ,
 Cca se pò cammenà co ll' oro mmano.

Justo ntiempo no zammaro pe strata
 Nce consolaje co ste ddoje parole =
 « Signò , sta notte è stata sbaliciata »
 « Na valice da dudece marjuole =
 Misericordia ! co le ffacce affritte
 Decettemo ntra nuje , mo simmo fritte !

La fantasia de fuoco se facette ,
 Na scarreca aspettavamo a li rine ;
 Le ffrasche nce parevano scoppette ,
 E le bbufare chiorme d' assassine ;
 Co sso triemmolo ncuorpo finarmente.
 Vedimmo San Germano , e nn' era niente.

Arrivate che simmo a la locanna —
 Ne , addò sta lo gran pranzo apparecchiato ?
 D'averne dato ncarico a Dognanna
 Frugolo pe la via non s' è vvantato ? —
 Ma pe no caso che n' è mmaje socciesso ,
 La lettera arrivaje lo juorno appriesso.

De vermicielle nc' arremmediaje
 No vacilo lo cuoco , e ffuje discreto ;
 Po no fritto de treglie , e dde palaje
 Ch' erano vive na settimana arreto ;
 E n' altro pesce 'nbianco profumato ,
 Pecchè , mmarisso ! lle fetea lo sciato.

Frugolo pe scassà sto farfallone ,
 Mette ncampo n'asciuta ncopp' Arpino ;
 Nc' è la casa de Tullio Ciciarone ,
 Nc' è bella gioventù , nc' è sango fino ,
 Nce sò famiglie mposemate e guasche ,
 E nce ricevarranno co li masche.

Isso è amico a lo Sinnaco , e a l' Alietto
 Pò ttutto a lo Collegio Tulliano ,
 Nce tene pe ccompare no prefetto ,
 E no miezo parente sacristano. . .
 Io tanno sferro , e cco lo ffele mmocca
 Lle dico : nc' aje stonate , e ba te cocca.

Ma chi scanza no guajo nell' autro ncappa ,
 Lo Marchese esce 'ntierzo co na juta
 Nfi a Ccasamare pe bedè la Trappa ,
 E nce sò da seje miglia de sagliuta !
 « Gnernò , sta corza è troppo faticosa »
 E tutte responnettero , n' è ccosa.

— Locanniè , de li ciucce ncaparrate
 Scigliene uno pe mme de bbona fede ;
 Che cammina cojeto pe le strate ,
 Ca' nvita mia sò ghiuto sempe a ppede ,
 E non borria tornà coll' ossa rotte ;
 Aje capito ? — Aggio ntiso — Bbonanotte.

Li compagne mme fecero le bbaje ,
 E io mme jette a nforrà dint' a lo lietto ;
 A mmalappena ll' uocchie appapagnaje
 Che mme sento ntronare no duetto
 De trombune , e ffangotte , e ntra me dico :
 Ha già pigliato suonno chill' amico !

Senza dormì , sto a n' ora de matino
 Ncopp' a lo ciuccio co dduje ruonte allato ;
 Mm' afferro a ll' uno pe lo crovattino ,
 All' auto do' ccapezza , e scorriato ,
 E azzò la cosa non benesse 'nfieto ,
 No compagno aggio nnanze , e n'auto arreto.

Donn' Urbano avea ncuollo no cappotto
 Che lle scenneva comm' a chiovejale ;
 Nninche Frugolo dice: « avite sotto
 « Lo cchiù polito, e ddocilo animale »
 Lo ciuccio a lo connutto aprie le ccorze ,
 E lo cappotto ne pavaje le ttorze.

Crepannoce de risa , e cco cchiù ffešta
 Già simmo a salutà Montecasino.
 Che majestà ! Che bella cosa è cchesta !
 Fuje cierto no miracolo devino
 Che trasportà facette all' aria 'ngroppa
 Statue , marme , colonne a nflì ccà ncoppa !

Te! vi che Cchiesia! Trovance na parte
 Ch' all' uocchie non te jetta no sbrannore!
 Ll' urdemo sfuorzo te nc' ha fatto ll' arte
 Pe ffà na degna Casa a lo Signore!
 E pe mmiezo a lo spanfio de li marme
 Nce può contà le mmaraveglie a ssarme.

Le ccolonne ngranite assaie cchiù belle
 Songo dell' arche , e ll' arche cchiù de lloro!
 Chillo Coro t' abbaglia le Ccappelle ,
 E le Ccappelle abbagliano lo Coro!
 Nfra le ppitture fricceca la mano
 De Solimena nuosto , e dde Giordano.

Quanno schiasseja chill' organo , te siente
 Sfornerà concierte , zinfonie , duette ;
 Sonano dinto tutte li strumiente ,
 E ll' Angiole da fora le ttrommette ;
 Mbriacate li sense a cchill' accuorde ,
 Ncoppa a la terra d' essere te scuorde.

Che Mmonasterio ! D' ogni correturo
 Nne può caccia duje larie de Castielle ;
 Ll' archivio ha de lo secolo cchiù scuro
 Li secrete annascuse into a le ppelle ;
 E cco ss' aità la Libbraria s' accorda ;
 Ca lo chiuppo a Fforcella s' allicorda.

Pe bedè tutto nc' avarria voluto

De stà llà ddinto ommanco pe no mese ;

Ma lo Cielo s' è fatto de velluto ,

E nce potria spognà pe cchelle scese ;

Perzò nce ne scenniettemo correnno ,

Senza cafè , pecchè se stea facenno.

—Tocca cocchiè ; facimmo na carrera

Nfì a la Merfà ; llà Frugolo nce ha dditto

D' avè speduta apposta na correra ,

D'anguille , e ttrotte ad ordenà no fritto...

Ma la correra manco era arrivata ,

Ed avimmo pe ggrazia na frittata.

—Aggiatece pacienza ; la mmalora

Mme vo perseguità , Frugolo dice ;

Ma vedarrite quanno simmo a Ssora

Che v' aggio fatto pe sservi ll' amice ;

Llà ve farraggio avè liette de penne ,

Pranze, e ccene da zite..—Egghiammoncenne.

Comme songo cchiù bive ste Ccampagne !

Comme sò sberrezzute ste berdure !

Llà sciumme , llà païse , e llà montagne ,

Ccà puonte , ccà vallate , e ccà chianure !

E te sparte lo Liro , che nce assomma ,

Li confine de Napole , e dde Romma .

Toccata Sora , a ffà spià se manna
 Addò stà chi nce alloggia... Oh ! che rroïna !
 Nc' è na cammara schitto a la locanna ,
 E lo pizzo cchiù friddo è la cucina !
 E nnuie restammo pe sso schiaccomatto
 Mmiezò a la strata co lo tiro a cquatto !

Nce dà corraggio lo Marchese , e ddice :
 Pigliammoce ssa cammara a bbonora !
 Nce starrimmo nzardate comm' alice ,
 Ma avimmo a ffà li zingare a cchest' ora ? —
 Trovano justo , e necessario chesso ,
 Isso va nnanze, e nnuie saglimmo appriesso. —

Ma Frugolo addò canchero è squagliato?
 Che pe ss' urdemo butto de veleno
 Ll' avesse lo dejavolo cecato
 D' affogarese dinto a lo Fribbeno ?
 No ; jarrà pe riparo a sto scompiglio ; —
 Lo poveriello è tanto buono figlio ! —

Ne, signò la carrozza , e li cavalle
 Spara lo postiglione , addò li mmetto ?
 A sto paese non ce songo stalle ,
 E io povero scasato addò mme jetto ?
 Aggio ncuorpo de famma na tropeja. —
 « E la nosta purzì manco pazzeja. » —

Comme po s' accordaje sto calascione

A ddirvelo sarria no frusciamento ;

Nce dette n' autà cammara Massone

N' amico mio de core , e sentimento ;

E Don Ciccio Giammite ommo spitale

Nc' alloggiaje la carrozza , e ll' animale.

Nce diè lo Locanniero , e Donna Pavola

No buono pranzo dint' a n' ora e mmeza ;

Co bello garbo nce serveva a ttavola

Na vecchiarella che pareva Zeza ;

E attuorno nce facevano squasille

Doie gatte co na schiusa de moscille.

Trincammo nzieme , e senza fà stravizze

Nce jettemo a nforchià dinto a le pezze :

Che belle strappontine de capizze !

Pe li ciucce sò bbuone a ffà capezze !

Co ttutto chesso nc' afferraje no suonno

Che manco li cannune non ce ponno.

A le sseje de matina lo ccafè ;

Nce ne jammo a le ssette a sentì Messa ;

All' otto , doppo fatto diggiunè ,

Ntela , corrimmo all' Isola de pressa ;

Ca vedè primmo pe la via se deve

Na maraveglia de Monzù Lafreve.

Na Machena venuta da Ngritterra
 Pe bbona sciorte de li cagn'a ppezze ;
 Le bennono chiù ccare , o che pe tterra
 Le ttrovano , o pe ddinto a le mmonnezzze ;
 Se n' agliotte la Machena le ssomme ,
 Te nne fà na recotta ; e ssiente comme.

A ddoje rotune fa venì li mote
 Lo Fibbreno che sbocca , e le ffragella ;
 Vottano ste rotune all' altre rrote ,
 Ll'arteteca s' afferra ogne rotella ;
 E le ppezze sedonte , e le mmappine
 Nseje minute sò ccarta , e senza fine.

No ngiegno chesse ppezze te spetaccia ;
 N' auto nne fa na pasta , e la jancheja ;
 N' auto stenne ssa pasta , e cagna faccia ,
 Pare na tela d' acqua che passeja ;
 N' auto la ntosta , alliscia ; e dde perzona
 S' appresenta la carta asciutta e bbona.

E ccarta pe nce scrivere le llettere ,
 Carta fina , bastarda , e a la rejale ;
 Carta pe stampà libbre , e pe nce mettere
 Tonnina , aulive , chiapparielle , e ssale ;
 Carta pe le ccopete , e li taralle ,
 E ccarta pe nfascià li portogalle.

E dde tutte sse ccarte se nne fanno
 Da diecemilia resemme a lo mese !
 Mo quant' arrive e assumme dint'a n'anno
 Che guadagno se fa ncopp'a le spese!
 Ma la Nnustria se pizzeca la parte
 De sso guadagno che t'ha ffatto ll'Arte.

Viene ccà , videtelle ste ffigliole
 Pe llavorà dint'a sta sala aunite !
 Mme parono cchiù belle de lo sole,
 E cchiù rosecarelle de l'antrite ;
 Nfaccia a lloro nce schioppa le rrose ,
 Ma sò ttutte modeste, e bertolose.

Nisciuno nce pò mettere l' assisa ,
 Pocca hanno ogne ddecenzia che se deve ;
 S'appontano nfi a ncanna la cammisa
 Chìu ghianca de li sciuocche de la neve ;
 Portano li corpiette , e le ggonnelle
 Senza mbottonatura , e ssò cchiù bbelle.

Co ll' uocchie ncoppa a la fatica sola
 Attuorno non le botano pe nniente !
 Da vocca a lloro n'esce na parola ,
 Co ttutto ca le pperne hanno pe ddiente !
 V'iato chi sposà nne pò carcuna !
 Se porta int' a la casa la fortuna.

Spasa ncoppa a lle ttavole la carta,
 Chi la stenne, l'alliscia, e la confronta;
 Chi da miezo lo ffraceto nne scarta;
 Chi p'agghiosità le rreseme la conta;
 E cchi fogliette stace a ssiggillà,
 Ca pe ffrostiere s'hanno da mpattà.

Chisto che d'è? Palazzo de qua Ffata?
 Mme dice stoppafatto Donn' Urbano,
 Nuje stammo ncopp' a ll' Isola ncantata?
 O dinto a qua Sserraglio de Sordano?
 Lo Marchese che ntrepeta sta chiosa,
 Jammoncenne, nce dice, n'è cchiù ccosa.

Avimmo da vedè le Ccascatelle,
 La Cascata dell' Isola, e le ffraveche
 De li panne de Zino, e Porcinelle,
 Nè nc'è che n'ora pe ttirà ste sciaveche;
 Nuje danno n'autra occhiata a chelle nnenne,
 Gnorsi, lle responnimmo, jammoncenne.

Ll' Isola ntra duje Sciumme se renserra
 Che ll'abbracciano nsieme da compagne;
 Lo Fribbeno la cegne terra terra,
 Lo Liro s'accravacca a le Mmontagne,
 E dda llà co na faccia nsaponata
 Lle cade ncuollo, e cchessa è la Cascata.

Sto Sciummo, che lle fete lo mostaccio,
 Non contiento de tutto sto fracasso,
 Pe mmiezo ad aute bbie stenne lo vraccio,
 Se nzorfa, e ba facenno lo smargiasso,
 E nninche ttrova ciente gradejattelle
 Se nce ngorfa, e tte fà le Ccascatelle.

Po ncontra de le mmachene li ngiegne,
 Se mperra, e sse nce fà na poniata;
 E mmente se le ddanno pe le ccegne,
 Ncoppa lana a bizzeffia s'è filata;
 E li telare tessono da lloro,
 Panne, carmucche, e ppezze de castoro.

Cancherò! ccà porzì na caravana
 Nc'è dde nenne spicate, e guaglioncelle!
 Mmiezo a bammace, e llippole de lana
 Songo esse pure aggraziate e belle!
 Ma mme fece riflette Donn'Urbano
 Ch'erano bbelle de seconna mano.

Gnorsì, ma io non poteva saziarme
 De vedè ll'arte mmano a ccrejature;
 E all' uocchie me venevano le llarme
 Benedicenzo a le Mmalifatture,
 Che a ggente miserabbòle te face
 Campà lì juorne dinto a la vammace.

Ma comme nce sbatteva lo scianchetto
 A mmagnà nce ne jammo da Giammite;
 Bene mio! che scialata! che bbanchetto
 De pesce frisco, e ttrottole squisite!
 E, nfra tant' autà rrobba che nce sciocca,
 Che pizza doce che te squaglia mmocca!

Cafè, rosolio, niente fuje de scarto,
 Niente nce fuje... Ma de parlà nne lascio,
 Sonano vintidoje manco no quarto,
 E stà da n' ora la carrozza abbascio; —
 Mille razie, Don Ciccio — l' abbracciammo,
 E già miez' arracchiate appalorciammo.

Sora mia, statte bbona; Isola bella
 Covernate, e ssi maje t' accorre niente
 Comanname; oje, Fribbè, salutamella
 La cartiera, e porzì lo contingente;
 Addio, Merfa; toccammoce la mano,
 Ca jammo a ffà le ppose a San Germano.

Da San Germano la matina appriesso
 Pigliammo volo d'anemo cojeto;
 E pe la via vedettemo lo stesso
 Che s'era visto già tre ghiuorne arreto;
 Perzò pe cchiù nò starve a nfracetà
 Faccio sorece mmocca, e ppunto ccà.

Scompetura.

**

PE LO BBELLO IUORNO DE LO NOMME
DE LA SIGNORA D. MATALENA L.

STROPPOLA A FFRANFELLICCO.

Tutte già te sò rresciute
Quant' agurie ammantecate
Int' a ssimmele Jornate
Io te fice, o Matalè.

Tu può vennere salute,
Sì sguazzona co l' amice,
Aie manteca, e cchiù felice
De te ffemmena non c' è.

Lo marito te vò bbene,
Tu lle sì ffedele, e amica,
Aie no figlio bbenedica
Ianco e russo comm' a tte.

Io non saccio nchisto juorno
Che auto agurio t' aggio a ffà;
Mpietto appiennete no cuorno
E la mmidia fa schiattà.

PE DDENGRAZIAMENTO

A LO SIGNORE GENERALE BROCCHETTI

DERETTORE DE LO MONASTERIO DE GUERRA, E MMARINA

STO QUATTUORDECE.

Signò, puozz' esse sempe bbeneditto
 E sguazzà ntra lo bbene a ttutte ll' ore!
 Te sì ddegnato farne no favore
 Che ddint' all'arma portarraggio scritto.

Lo ddà n' ajuto a cchi se trova affritto
 Pe li guaje che nce manna lo Signore,
 È n' opra santa, è na bontà de core
 Degna sulo de Cesare nn' Aggitto.

Cierte bbote te nzurfe, e mmuste sense
 De grà rrigore, si la vocca sferra,
 Ma saccio che lo ddice, e nno lo ppiense.

Schitto de farce bbene sì ccapace,
 Gnorsì, sì Dderettore de la Guerra,
 Ma nsostanzia sì bbuouo a ddà la pace.

PE LO NOMME

DE NA PARIGLIA DE TERESE

MAMMA , E FFIGLIA

N' AUTRO QUATTUORDECE.

D' Ottobre oje conta quinnece lo mese ,
 E nc' è ncasa de nomme na pariglia ;
 Io mo non saccio nfra ste ddoje Terese
 Si ncenza cchiù la Mamma, o cchiù la Figlia.

La Mamma è bbona , e nno sparagna spese
 Pe ddà sempe cchiù spanfio a la famiglia ,
 La Figlia è bbella , amabbele , e ccortese ,
 E schitto a stodejà gusto se piglia.

Mperrò la Mamma che de notte , e gghiuorno
 Se la schiude co ll' uocchie ; aspetta ll' ora
 De subbeto levarsela da tuorno.

Embè , Nennè , spicciammoce a bbonora ,
 Datte priesto da fà ; sarria no scuorno ,
 De starte ncasa , e nn' obbedì la Gnora.

PE LO NOMME

DE N' AUTRA D. TERESINA

N' AUTRO QUATTUORDECE.



Teresi, stammatina da lo core
 Non saccio quant' agurie mme sò asciute;
 E ppe sso bbello Nomme a ffarte annore
 Co ll' altre concorrente sò bbenute.

Lo primmo agurio ch' è n' adulatore
 Farrà bbiento de ss' arma a le bbertute;
 Lo secunno vorrà co schietto ammore
 Che lo Cielo te dia bbene, e ssalute.

E ttutte ll' altre che sò bborpe vecchie
 De marito qua pprima parolella
 Te verranno a ssiscà dint' a le rrecchie.

Chi sa! si trovarranno a ffà credenza!
 Ca sso core, co ttutto che si bbella,
 N' ha commenzato ancora a ddà ll' udienza.

A LO SIGNORE

D. BICENZINO TORELLI

PE RRESPOSTA A NO MMITO FATTO A LI POVETE DE NAPOLE

D. Bicenzino de sto core.

Aggio letto dint'all' Onnebus de la settimana scorsa n'avviso che ffaje a li povete appardate, pe nn'avè subbeto qua ccanzona, o sonetto, co la ntenzione destamparle, e dde dà, co ssa messa pezzuta, la soleta Strenta a l'Assocejate pe non farle scappà. Eccome ccà pronto a l'appello. Ll'autre scritture de ciappa t'avranno fatte a cchest' ora vierze a llengua Trosca che ssanno de bbarattole e dde percocata. Io pover' ommo co cchella de lo Lavinaro a mmalappena t'aggio miso 'ncomposta no sonettiello, comme fosse no cetrolillo a l'acito. Non mme fà ssa resella a bbavone; ca mmiezo a no scialicco de piatanze scevete, e ccannarute nce dice lo cetrolillo, pe t'arapì lo spireto.

Sto sonetto a pprimma vista pare che pparle a schiovere. Ma n'è accossì. È bbero, cchiù cche

bero che tanta vote la Raggione ave tuorto ; e ssiente pecchè. La Raggione è na Signorella comprita co na vocella fina , traseticcia , azzeccosa ; e lo Tuorto è no vastaso co lo cannicchio d' abbrunzo. Che nne vene ? Ca si chisse attaccano nzieme qua llotano , lo cannicchio d' abbrunzo vence la vocella azzeccosa , e la ggente accorza che n' ave naso p' addorà la Iostizia , va nfavore a lo tuorto che strilla cchiù.

Accossì pure succede quanno s' appiccecano mmiezo a le cchiazze le ffe mmene ; quanno dint' a li cafè s' armano chiaite de cose che non se sanno ; e quanno a li triate se vo accramà na museca nova , o na prosa. Li strillazzare , e li vattiente la venciono. Te sentarraje qna bbota nfracetà li stentine ; ma non c' è che ffà. Lo remmore è no prepotente che ddà varrate de cecato ; e pperzò Catone se nne speretaje de pavura , e nce lassaje scritto de fuirelo comm' a lo ccuotto. Da lontano mperrò se pò arreseca de dirne no poco de male.

Isso mo quanto vene , e mm' arriva. E ppo io parlo ngenerale , nè ntenno d'affennere nisciuno. Si carcuno se n' affenne è ssigno che ttene la coda de paglia. Ntienneme a ssisco , compà Viciè , e ssi sta carta non te serve p'auto uso , falla stampà , e cchisto è lo

SONETTO.



Lo spratteco mmezzanno a no Paglietta
 Deceva Marco Tuzio Ciciarone:
 Si vuò fà sciorte, aïza la cascetta,
 Chia sto munno cchiù strilla ha cchiù rraggione.

Io mo saccio chi songo; e ppe na stretta,
 Che ntunno mm' appilaje lo cannarone,
 Mancaje de voce, e comm' a no porpetta
 Fice perde la causa di Milone!

Pecchè Rroscio fuie fatto catapano?
 Pecchè avea no cannicchio spotestato
 Che sparava nò miglio, e cchiù llontano.

E ppe cchessa raggione a lo triato
 Ll'Arte se scioscia, e nce la fà de mano
 Chillo ch' allucca comm' a ddesperato.

PE LO NOMME

DE LA SIGNORA D. CATARINA

*Vierze che rimmano a dduje, a dduje, e banno nprogeSSIONE
all' uso franzese.*

Da paricchie anne co qua mmollechella
 Io cresciuta mme sò na palommella.
 Chesta mettenno recchia a le ppertose ,
 Mm' appura e ddice tanta bbelle cose.
 Da stammatina sbolacchianno attuorno
 Mm' è bbenuta a pparlà de chista Juorno.
 La raggione già priesto s' annevina
 È lo nomme de Donna Catarina.
 Mme fa ssapè ch' è na figliola bbona ,
 Bella , saputa , affabbele , e pappona.
 Che coll'ago arrigama arbore , e sciure
 Danno nfi sentimento a le ffigure.
 E co la penna trova , e te sa mmettere
 Sapore e ccortesia dint' a le llettere.
 Ch'abballa , sa ccantà , parla franzese ,
 Ed a le Muse fa porzì le spese.
 Che pe gghionta ave scritte into a lo core
 Le bbertù de la Mamma , e dde lo Gnore
 Perzò sta puca d'oro senza pene
 Ha dda campà cient' anne into a lo bbene.
 Jurace ncoppa , ca non è buscia...
 Ed io ll' aggio respuosto: accossì sia !

PE LO NOMME

DE D. MARIANNINA

STA MMESCAPESCA.

Oje Mariannì, parlammo nconfidenza ;
Dimme co cche coscienza
Pozzo armà no taluorno
Pe ddà li buone agurie a cchisto Juorno ?
Lo nomme tuïo sarrà na cosa guappa ,
Ma pe ssagli sse ggrade a farle annore ,
Marisso chi nce ncappa !
Ha da jettà no cato de sudore.
Embè che mporta ?... N' è rraggione chesta
Che io te pozza lassà senza la festa.
E ccerto nne sì ddegna , ca lo core
Aje mpastato d' annore ,
E la capo de spireto e ttalento.
Aje le mmano d' argento
Che mmo fanno ricame , e ccappelline ,
Mo vorze pe zzechine
Mo sotto lume , ed abbete a ppasture ,
Mo coppolelle pe le ccrejature.

Quanno attache trascurze a llenga angrese,
 Quanno scrive nfranzese;
 E ncuorpo nce scommetto
 De lettura aie no ntiero gabbinetto.
 Suone ll' arpa; 'ntocchè lo chiano-forte
 Te faie venì l' arteteca into all' ognà;
 Ma te chiude le pporte;
 Comme sì la virtù fosse vrìogna.
 Dimme; va buono chesso?
 L' accesso è sempe accesso;
 E nsò ddove se mosta, sì no shaglio,
 Se ll' ave a ddà pe scrupolo no taglio.
 Donca miette jodizio,
 E ccerca de levarete sso vizio.
 Siente po che te dice
 Sto fusto pe bbederete felice.
 Puozze campà cient' anne,
 Senza nteresse e ddanne!
 Te pozza la salute 'nfaccia ridere,
 E lo Cielo mannà quanto desiderè!
 E puozze, pe non metterte a lo scarto,
 De ssa modestia perdere no quarto!

PE LO NOMME

DE LA SIGNORA D. CAROLINA

SCAMPANIATA A GGROLIA.

Signò, jurance ncoppa; sta giornata
 Pe tte ciente, e cchiù bbote ha dda venì:
 La musa dormigliona s'è scetata,
 E fitto fitto mme lo stace a ddi.
 Sta Musa vecchia che bbuscie non dice,
 E ssape lo ffuturo annevenà,
 Mme conta che sarraje sempe felice
 E io nce scommetto che accossì sarrà.
 Primmo pecchè si bbertolosa, e bbona;
 Secunno ch' aje modestia, e nnobirtà;
 Terzo pecchè sì affabbele, e ppappona,
 Quarto pecchè sì bbella a ddoje mmità.
 Quinto pecchè mpastate t' aje li figlie
 Aggrazejate, e ccare comm' a tte;
 Sesto pecchè nfra tutte le ffamiglie
 Na mamma accossì ttennera non c' è.
 Settimo pecchè tiene no marito
 Ch' è na crema de sinno, e dde vertù,

Co no core de zuccaro ngranito
E na capo che bbale no Perù.
Ottavo... ora tu vide sta canzona
Dinto a qua maro mme vo fà ngorfà!
Manco na scrivania de raziona
P' assommà sse bbertù potria vastà!

PE LO NOMME

DE N'AUTRA DONNA CAROLINA

NO REGALO DE QUARTAROLE.

Stammatina a ll' agurie cchiù ccare
Aggio ditto, mettennome ntuono,
Jatevenne a la casa de Buono
Che a la strata de Puortece sta.

Trovarrite na bbella figliola
Che se sta da qua mmese llà fora,
Pe l' affetto che porta a la sora,
Pe ppoterse no poco spassà.

A ncrinà la patrona de casa
Pe ccreanza vuje site tenute;
Che lo Cielo ll' agghionga salute,
E ffortuna prejate porzi.

Senza farle passà la mmasciata
 Po a' la nenna ngrinateve nchietta;
 Sibbè stesse facenno toletta
 Vuocchie nterra, e pparlate accossi.

Ciente vote sto quatto novembre
 Caroli, pe tte faccia retuorno;
 De sso nomme azzecuso lo juorno
 Nfesta, e ppace tu puozze godè.

Ma co ppatto che l'anno che bene
 Singhe sposa de ricco Signore,
 Che t'amasse co ttutto lo core,
 E bbenesse 'ncampagna co tte.

Da la Sora se sciala; lo ssaccio,
 E scialà sempe a mmeglio se pozza!
 Ma tu llà sì pportata ncarrozza,
 Ed è mmeglio 'ncarrozza portà!

Quanto bbene te fa na parente
 Caroli, non te leva appetito;
 Ma lo bbene che dà no marito
 Va no banco, e ffelice te fa.

PE NA CAMPAGNATA

Fatta co ccierte buone amice , e lo bravo Marchese Cuorposano che porta nsacca lo lliquore annodino obbregato.

SONETTO.

Lo jcatore che non è pacchiano
Si vence a scopa , caro te lo bbenne ;
Pecceja porzi co cquatto sette mmano,
Pe la ragione che lo piccio renne.

E perzò lo Marchese Cuorposano
S'allamenta spassannose , e pretenne
Ch' ha na salute che no bà no grano ;
Piglia pisce e gghiastemma, uscia mmentenne?

Po zompa comm'a grillo pe ccampagna ,
E ddoppo no tre mmiglia de cammino
Se mmuta , jetta qua ghiommisso, e mmagna!

Nchesta valle de lacreme , e dd'affanne
Co lo piccio , e lo spireto annodino
Lo poverommo vo campà cient' anne.

PE N' AUTA ASCIUTA A NNISETA

NCOPPA A LO STISSO RIEPETO.

S O N E T T O.

L' amico pe le ssolete ammoïne
 Sempe che bba 'ncampagna te picceja;
 E nnanze de magnà se spozzoleja
 No tierzo ommanco de li piättine.

Primo te fa no ntacco a li torine,
 Po ll' alice, e ll' aulive te saccheja,
 La fellata se mazzeca, e sbareja
 Co li nierve, lo stommaco, e li rine.

Po nce dà comm' ogne auto cristiano,
 Massime si la rrobba é ccannaruta,
 E ccerca qua ccosella fore mano.

Siente, Marchè; te parlo tunno, e cchiatto,
 Quanno staje sano, si vuò fa n' asciuta,
 O non ce vengo, o pavarraje pe cquatto.

SONETTO CO LA CROSTA

PE LO BBELLO NOMME DE LA 'SIGNORA D.



Teresi, mm' allicordo chisto juorno,
Epperzò voglio farte no sonetto
Ragamato d'agurie attuorno attuorno
Eccomme me so asciute da lo pietto.

Senza che mmaje t'affrigga qua ttaluorno
Io spero che tu ngrasse into a lo nnietto,
Npietto d'argiento appiennete no cuorno,
Vli mal'uocchie accossì ffaje despietto.

Maje quanno suone' puozz'avè paura!
Iettalo, nenna mia, sso tremoliccio
Ca mo sì ggrossa, e nnò cchiù criatura.

Vh! pozza priesto a n'auta casa nova
La virtù, che non fa niente a ccrapiccio,
Into a sso core schiudere la cova.

A DON MARCO VARRECCHIA

NCOPPA A LA STRATA DE FIERRO

NO CONSIGLIO 'NCAPITOLO.

Vuò fà n'asciuta nfì a Castiellamare
 Pe la strata de fierro qua gghiornata?
 Siente, Don Marco, chello ch'aje da fare.

Comme vide na bbella matenata
 Si no 'ncarrozza, a ppede va vattenne
 A lo mpuosto pe ll'ora destenata.

Pigliate lo viglietto addò se venne,
 Trase coll'aute dint' a le ccancella,
 E ttrovate no pizzo che te renne.

Nninche siente sonà la campanella
 Nchiommate dinto a cchillo carrettone
 Che te spetta secunno la cartella...

Mo ggira comm'a scorza de mellone
 La machena che ntorza, e gghietta fieto
 Da la panza abbottata de cravone.

*

Po co no passo jappeco , e quieto
 Co lleverenzia de la faccia vosta
 Se schiaffa a tutte quante da dereto.

Arde, e ccaccia no fummo comm' a gnosta ,
 Po te spara qua ssisco pe llamiento ,
 E accommenza pe correre la posta.

Auto che pposta ! vola comm' a bbiento ,
 Vola ma senza scelle, e mmanco zampe ,
 E ss'agliotte no miglio a lo momento.

Case, sciumme, palude, arbore , e ccampe ,
 Nfi la grotta annoscosa a no mantiello
 Te scappano dall'uocchie comm'a llampe.

E nfaccia a sso spettacolo noviello
 Mente tu rieste peo de no ncantato ,
 Siente l' addore de lo Granatiello.

Llà n' auta caravana a lo steccato
 Pare che ttenga li tirre petirre
 Pe pigliarse lo pizzo ch'ha pavato.

La machena ch' ha ncuorpo lo lessirre
 N' ata vota se torce , e ccorre corre
 Comme la secutassero li sbirre.

Va pe mmiezo a le llave , e le zzavorre ,
 Lella palella , senza piglià bbotta ,
 E la vene a scontrà la primma Torre.

La Torre spisso scammazzata e ccotta
 Comm' a na pizza sotto la cenisa
 Da la montagna ch'ogne ntanto sbotta.

E ssempe tosta , e cco la vocca a rrisa ,
 Auzaje la capo da la sebbetura ,
 E sse mettie cchiù ghianca la cammisa.

Po co la nnustria , e la malifattura
 De maccarune... Ma che d'è? Tu nfronte
 Muste , Don Mà , qua ssigno de paura ?

Si fossero le bbuce de lo monte
 Che s' è ffellato , e ccride fà tre asse ;
 O le cchiacchiare a ddanno de li ponte ;

O de l'arena che pò fà sconquasse ,
 Duorme sicuro : nc'è chi pensa , e bbole
 Che tu senza pericole te spasse.

Va , va , non ddà cchiù rretta a sse pparole ,
 E tt'addecreja lo spireto a sta scena
 Che ccagna , e scagna , e ffricceca a lo sole.

Quanno alliffaje sto maro, e cchest'arena ,
 E ffice lo vestito a sta campagna ,
 Cierto mamma Natura stea de vena.

Comm'è ccara de Somma la montagna
 Mo che s'è ffatta santa , e mmanco sputa ,
 E ppe ttutta la strata t'accompagna !

Cancaro! nche te sfizie a ssa veduta ,
 La bbella Torre de la Nunziata
 La coppola se leva, e tte saluta.

E la machena tanto accrejanzata
 Pe ffà na leverenzia a sta Signora
 Ccà pe quacche minuto sta fermata.

E ppo ntela, e lo riesto se devora !
 E ttu pe nnanze all'uocchie a mille, a mille
 Vide bbellezze non bedute ancora.

Cantano li marvizze, e li froncille;
 Nenne, e guagliune fanno la vennegna,
 E ddinto a Ssarno sguizzano l'anguille.

Mo chillo carreja prete, e cchisto legna ;
 N'auto menesta pe li verdummare,
 N'auto ciucce co sselle, e cco le ccegna.

Ccà vennono gallette li fornare ,
Llà carne de vitella li chianchiere...
Scinne, Don Mà, ca sì a Castiellammare.

Te stonano ciucciare , e ccarrozziere
Chi pe Ssorriento, e cchi pe Quisisana ,
E dda mare te chiamma lo Cantiere.

Respunne a mme? Co ttrentacinco rana
Può avè cchiù ggusto sì non sì coniglio?
Dint' a n' ora aje veduta na semmana ,

E tt'è ccostata na decinco a mmiglio.

A' CCOMPA ROCCO ZEPPOLA

*Contro a lo Tiempo che nce ha puoste tutte
a Nnammuollo.*

SONETTO A SCHIOVERE

A li sette de Novembre de chist'anno 1842.

Compà, si pische dint' a lo Ppassato
No tiempo comm' a cchisto nò lo truove :
Fa sempe n' arte comm' a no dannato,
E cchiove, chiove, chiove, e ssempe chiove.

Pe ll'acqua ch' a llangelle ha bbommecato
Ave fatto a Settembre magnà chiuove,
Ottobre comm' a ppurpo t' ha spognato,
E ppe Novembre fa le stesse prove.

Nce ha sfonnato le scarpe, e li stivale,
Nce ha pportato 'ncampagna la scaienza ;
E bbò mannarce tutte a lo spetale.

Tiempo schefuso cchiù de na carogna,
Che n' ave annore mpietto, nè coscienza ;
Sciù pe la faccia soja senza vriogna !

LETTERA

A N' AMICO MALATO.

D. Pippo Caro.

Ajere mmatina io mme ne jette a sentì la predeca a Santo Dommineco Granne. Sudaje na cammisa pe mme mpizzà schitto dinto a la porta de la Cchiesia. Nc'era na folla che non ce sarria sperciata na suglia. Ma , scosta ccà , votta llà , scarpesato da chisto , scarpesanno a chill' auto , arrivo arreto a una de chelle ccolonne. Non bedeva lo Predecatore , ma vedeva tutta la ggente alloccuta , ncantata a ssentirlo , senza levarle maje ll' uocchie da la fronte.

De chillo mo se pò ddì che n' accatta chiacchiere. È no sciummo spotestato de loquenzia sacra ; te spremme tutto lo zuco da la rettoreca ; e ha na lengua co la forza de lo vapore. Te dice dint' a mmez' ora chello che n' auto nce scassarria n' ora pe ddirelo. E ba che nne sbagliasse na virgola ! Predeca co la ragione , e cco le Scritture a le mmano ; e tte stregne de manera li panne ncuollo che non puoje dà cchiù no passo. Sia bbeneditto isso , e cchi co profitto lo sente!

Io che mm' allummo comm'a lligno scianmifero quando veco no piezzo gruosso, lesto addimanno a no Patre de chille, chi fosse lo Predicatore? È no giovane, mme responne, de trentacinc' anne, venuto da Livuorno, ma nato a Ppisa, e sse chiamma Mellone.

= Mellone!... Parente fuorze de chill' auto Mellone 'nprova, lo si Macedonio che mmette tant' annore nfaccia a li Taliane? = Chesso mo no lo ssaccio. Ma mme pare de no = Mille razie, patre = È ppoco a sservireve.

Ascenno da la Cchiesa, e pensanno a lo mmatteto prezioso de ssi duie Mellune, mme scapolaje pe la via sto cocozziello nsemmentuto, che te manno pe ll' uso commeniente, e tte voglio mpattà pe

S S O N E T T O.



No Mellone che bà n' onza a la fella ,
 Auto che cchille de Castiellamare ,
 Vole appurà pecchè la luce è bbella ,
 E lo ccostrutto te nne sa ccacciare.

N' auto Mellone asciuto da la cella
 A Nnapole è benuto a predecare ,
 Co na lengua che pare na rotella ,
 Co no fuoco che abbampa , e ffa tremmare.

Chisto spanne la luce de la Fede
 A chi pe lo peccato se fa nnotte ,
 Chillo schiara la vista a chi nce vede.

Che bbella cosa ! Chi sa ! quante e cquante
 Pe no Mellone cresceranno addotte !
 Pe no Mellone se farranno Sante !

A LO SI MATTEO NCOCCIUTO

LA MOGLIERA NZORFATA.

NZIRIA A FFESTA.



Ne? chessa collera comme nce cape?

Chessa paturnia che hbene a ddì?

Non farme lefreche Mattè; se sape

Che a Montevergene mme tocca a gghi.

Lo ffice mettere da lo notaro

A li capitole pe ppatto; e mmò

Vuò farme agliottare sto muorzo amaro!

Ne ne, coscienza tenimmo, o no?

Nce va Lucrezia, nce va Menella,

La vecchia Meneca porzì nce va;

Nce va la sgubbia de la sie Stella,

Ch'ave na vozzola ch'è na piatà,

Sò pposte ntruocolo nfì le zzellose

Che mmeze jetteche songo a bbedé;

E a mme che schioppaano nfaccia le rròse

Mpedì vorrisselo? Va, leva lè!

Avisse a ccredere che ssò qua llocca

Che co le cchiacchiare se fà mpallà?

Ccà mmiezo subbeto ch'apro la vocca
 Se fanno a ppunia pe mme ngaggià.
 Già masto Nnufrio ncopp' à lo carro
 Ch' ha ppuosto nn' ordene portà mme vò,
 E n' auta maschera che ha qua catarro
 Vorria portareme nchist' anno, e ppò.
 No pesciavinnolo de lo Pennino,
 N' alluminario de la cetà,
 N' ammola fuorfece, no caccia vino,
 So asciute ntridece pe mme mmità.
 Io puosto nzuocolo aggio ogne accunto
 Pecchè non pozzase parlà de me;
 Ma si perfidie mme miette 'npunto,
 E lo sproposito faccio, Mattè!
 A Mmontevergene la ggente a llava
 Sparanno tronola vide partì,
 Nc'è gghiuta mammama, nce jette vava,
 E cchesta è mmutria de non ce jì?
 Mm' aggio da mettere le ffrasche nfronte,
 Ll'antrite a ppiennole da ccà, e dda llà,
 Mmano na perteca, ncopp' a lo ponte
 Cantanno ll' aria = Perucca e bbà.
 Non boglio perdere pe tte la fede,
 Sarvarme ll'anema mme mporta cchiù;
 Si tu sì areteco che non ce crede,
 E bbuoje dannarete, dannate tu.

PE NO RETRATTO FATTOME

*Comme pe nciarmo fora na loggia de lo si D. Pippo
Cirella , ntra no miezo minuto scarzo. A
Compà Rienzo fede de nasceta*

`NCAPILO

Mmare nuje e cche ssimmo !.. Nnitto nfatto
Mo nnanze into a no tierzo de minuto
Mm'è scapolato fora sto retratto.

Sarrà de no cetrulo nzemmentuto,
E cchesto ccà mettimolo da parte,
Ma sulo sulo è nnato , e ss'è ccresciuto.

Compà Riè , si tu vuoje capacetarte
Viene a ttrovà Don Pippo na matina ,
E bbedraje sto miracolo dell'arte.

Vedraje comm'isso scerega e strofina
No quatrillo de ramma nnargentato
Co la vammace ncipriata , e ffina.

E ddoppo che te ll'ha buono allostrato ,
Azzò non faccia no mammuoccio spurio ,
Te lo porta a lo scuro a cagnà stato.

E llà nsecreto, no ppe mmalaûrio,
 Ma pecchè la salute nce guadagna
 Lle face n'onzione de mercurio. (1)

E ppo agghionta che nce ha n' auta magagna,
 Dinto a na cascettella te lo nzerra
 Pe ppaura che ll' aria se lo magna.

Lo mpizza quatto parme auto da terra
 A la cammara scura che ffa ttutto,
 E dda la Porta s'agguantaje Daguerra.

Sta cammara ave arreto no connutto,
 E llà tu nce aje da mettere la faccia;
 Pe bbederne cacciato lo ccostrutto.

La luce doce doce se nce affaccia,
 E ndoje botte te face lo servizio,
 Pittanno eccapo, e ccuollo, e ppietto, e bbrac-
 (cia.

Ma sà che nc'è? Lle manca lo jodizio
 De fà quarche finezza a le ffigliole
 Chennfronte, o dint' all'uocchie hannoqua bbi-
 (zio.

(1) Ccà pigliaje no rancio: l' onzione lle se fa doppo.

Non ce corrono mpegne co lo Sole ;
 O hbrutto , o bbello , te fa tale e cquale ,
 E ssi parle , te pitta le pparole.

Doppo , pecchè de macchie ha qua nze gnale ,
 Se lava comme fosse criatura
 Dinto a no bbagno caudo d'acqua , e ssale.

E accossì scapolata è sta fegura
 Che s'è nchiaccata dinto a ccheste ccarte
 Pe ffarne mosta a cchi non se ne cura...

Tu mme dirraje , Compà , che ad aute pparte
 Porzì co li medeseme prociesse
 Se fanno sti miracole de ll'arte.

N'aggio che ddirte ; veretà sò cchesse !
 Ma nc'è mperrò na defferenzia nchesto ,
 Che Don Pippo li ffa senza nteresse ,

E nce sole refonnere lo riesto.

PE LA SANTA PASCA

*Agurio co lo zuco de na peccerella
a lo gnore sujo.*

Oje te scrivo , Gnore mio ,
Non pe ffarete la sasca ,
Ma pe ggusto , e pe ggolio
De te dà la bbona Pasca.

Ste pparole sò le stesse
De la vocca , e dde lo core ;
Nò le ddico pe 'nteresse ,
Ca sò ffiglie de l' ammore.

Non sò cchelle mberniciate
Che te sparano a bbintotto
Le bbajasse , e li criate
P' abboscarse lo pezzotto.

Tu ggià ssaje che nchisto juorno
Co le cchiacchiare se magna ;
Pe li ricche è no taluorno ,
Pe la prebba e na coccagna.

Chisto vò lo sosamiello ,
Chillo n'uosso de crapitto ,
N'auto vò lo casatiello ,
N'auto ll' uovo bbeneditto.

Chi vò lardo , chi vò nnoglia ,
Chi presutto , e sopressata ,
Ca de farese ave voglia
La menesta mmaretata.

Nsomm' allongano lo vraccio
Pe scroccà qua ccomprimiento...
Ma ll' agurie ch'io te faccio
Dint' all' anema le ssento.

Si mperrò , Papa mio caro ,
Porzì a mme pe ccompiacenza
Daje quaccosa de denaro ,
Io farraggio l' obbedienza.

*Ll'opere bbone non se fanno maje veechie. Per-
zò voglio mpattarve pe nuovo st'ottavario*

NCOPPA A NA CARETA' PE MMUSECA

A cchisto munno caretà se fanno
Sempe da tutte ll'aneme piate;
Mperrò deverze ccaretà nce stanno
Scarze , de piso, prubbeche , annascose ;
Nce sò chelle che ccovano qua nganno
E nnuje chiammammo caretà ppelose ,
Nce sta porzì la caretà pe cricca
Che no piezzo de museca te scicca.

A proposeto nc' è no fattariello
Che ntiempo arreto succedette 'n Franza ;
Ve lo voglio contà ch'è tanto bello
Da fà ridere tutte a crepapanza.
E fuje pe n' ommo ch'into a lo cerviello
De museca nce tene na paranza ,
E ha na voce che pare de grancascia...
Ntennite già ch'io parlo de Labrascia.

Chisto che canta e na cetà te scasa ,
 E ave no core che non c'è lo paro ,
 No cecato trovaje nnant' a na casa
 Spremmenose a stonà lo Verboncaro
 Ncoppa a no violino addò nce ncasa
 Le ddete che sò spuonnole de maro ;
 E sse ngottaje , vedenno che la ggente
 Lle steva attuorno , e non le deva niente.

Lo zuchezzucò le scippaje de mano
 E se mese a ssonà comm'a no masto ;
 Corrono li franzise da lontano .
 Pe ssenti che nn'ascia da chillo tasto ;
 Isso po fatto quarche passamano
 Che fuje de sso commito l'antipasto ,
 Na voce de cannone aizaje da pietto
 E ncapo lle ntronaje chisto mottetto.

Signò , facite bbene a sto cecato
 Che ll'uocchie poveriello ! ave perdute ;
 Stace sempe a lo scuro , e nchillo stato
 Recorre de lo prossimo a l'aiute.
 Moviteve a piatà de lo scasato ,
 Ddio ve lo rrenne ncopp'a la salute :
 Isso niente se tene de nisciuno ,
 E vve lo ppavarà ciente ped uno.

E buje , masdamme , e buje madamoselle
 Che ssite larie de compassione ,
 Pensate a quà supprizio hanno le stelle
 Connannato sto povero ntruglione ;
 Isso non bede quanto site belle ,
 Isso non sape quanto site bbone ;
 E attocca a buje de mette no riparo ,
 E qua defrisco a cchisto caso ammaro .

Lo riepeto fernette , e pe rresposta
 De li frelluse chioppero li butte ,
 Le femmene che llà sso nat'apposta
 Pe ffare sempe caretate a ttutte ,
 De l'argiamma non dettero la mosta
 Ma le borzelle ne lassajeno asciutte ,
 E a lo cecato che se vedde ricco
 Parze de guadagnà no terno sicco .

Doppo chesso decite , addò chiù piglia
 Stò Rrè de li cantante annore , e famma ?
 Quanno fa lo Varviero de Seviglia ,
 O Assurro che te ngotta a Semiramma ?
 Gnernò ; state lontano ciente miglia ;
 Quann'ha cantato pe llevà l'abbramma
 Da cuorpo a cchillo povero cecato ,
 Tanto Labrascia no portiento è stato .

PE LO NOMME AURIUSO

DE LA SIGNORA D. CAROLINA A.



STROPPOLA.

Carolì, mme sò ffatto no guajo ,
Lo cerviello già mmiezo s'è strutto ;
Nzallanuto mme scordo de tutto ,
Nfi non saccio la Musa che d'è.

Piglio pizza pe ttortano , e ttrovo
Li pensiero mannate a lo storno ;
Ma non pozzo scordarme sto juorno
Ch'è no juorno de festa pe tte.

Pe sso nomme azzeccuso che ppuorte
Puozze bbella , e ffelice campà !

E cco squase , e ccarizze la sciorte
Comm'a ffiglia te pozza trattà !

NA PECCERELLA

CHE PORTA DA LA MAJESTA NA LETTERA A LO GNORE SUJO

PE DDARLE LA SANTA PASCA

e lle parla accossi.

Gnore mio, mo n'aggio tuorto,
 Saccio mo che gghiuorno è cchisto!
 E sta lettera te porto
 Che bbà cchiù de lo canisto,
 Che se manna pe la Pasca
 Co lo mazzeco, e la frasca.

Lieggetella; nce sta scritto
 Ch'io te porto tant'ammore!
 Comme sempe t'aggio ditto
 Co la vocca, e cco lo core;
 Tu sì bbuono, e tt'aje da fà
 Viecchio nterra, e Ssanto llà.

A LO SI D. CRISPINO VARRICIELLO •

POVETA PACCARIATO

NA PREDECOZZA A BBRACCIO.

E ttorna a ccoppe ! D. Crispì, lo ntienne
Ch'aje la capo cchiù ttosta de na preta?
Comme ! staje'nchiana terra, e non t'arrienne?

Tu che nce pische a ffare lo poveta ?
Ogn'arte è nnata pe ddà pane; e mmece
La toja spisso te manna a ffà dieta.

Chessa misero ntridece li Griece
Pe ddà no spassatiempo a li pensiere,
Ma pe magnà mmentarono la pece.

E doppo pe li Regne forastiere
Jettero spierte, e p' abbuscà l'aruta
Se mettertero a ffà li cafettiere.

E llassajeno a la gente cchiù cocciuta
A lo Prannaso de piglià la renza
Pe se rompe lo cuollo a la sagliuta...

Tu non me cride , e nne vuo' fà sperienza?
 Ma doppo che nce arrive che nne cacce?
 Llà ncoppa nc' è de casa la Scajenza.

De jetteche lle Mmusce hanno le ffacce ,
 Spenzano lauro senza fegatielle ,
 E li panne lle cadono a ppetacce.

Co tutto ca sò bbone , addotte , e bbelle
 P'esse faglie a ddenare , e senza gnuoccole ,
 Tutte e nnove restate sò zitelle.

Pe nfi Tralia co ttanta squase , e bruoccole
 Sta senza scarpe , e ncoppa a lo triato
 È connannata a strascenà li zuoccole.

Apollo , ch'è bbanchiero massiato ,
 Pe non se ne scolà comm'a cannela ,
 E pe mmettere lardo a lo pignato ,

Arravogliaje le bbagattelle , e ntela
 Se mise a ffà pe Ccielo da cocchiero ,
 E vennette calimma addò se jela.

Po quanno lle frusciarono lo zero
 Jette a guardà le ppecore 'ncampagna ,
 E ss'abbottaje de recottelle , e ssiero.

Chella vita lle parze na coccagna ,
 Se fice gruosso comm' a n' Alifante ,
 Le ccofecchie facenno a cchi non magna .

E cchill' amico sujo cchiù ccaro ? . . . E Dante ?
 Dante jette pezzenno ! . . . e de lo cuorio
 L' afficiale se nne fanno guante .

E flosse tutto pe lo refettorio !
 Ma de cchiù tu sarraie scommunecato
 Si non faje parte de no repertorio ;

Addò se trova schitto registrato
 Chi da vecchie sapute ho fflatto scisemo ,
 Pe ddà 'ncapo varrate de cecato .

Chisse non sulo all' uommene de pisemo
 Fanno l' abbaja comm' ad Eliseje ,
 Ma nfì lle levarriano lo vattisemo .

Perzò la Povesia cchiù non se reje
 Ncopp' a le ggame; e li povete a stiento ,
 Non sò che cinco , e cchi lo ddice seje .

Ll' aute sò mmuorte senza testamento ;
 Perzò te disse , e tte lo ttorno a ddicere
 Fa n' aut' arte , e non pascerte de viento .

Ca da lo Cielo se fa bbenedicere

Chi , quann'auto non sa , pastena rape ,
Semmena cocuzzielle , o venne cicere.

E dde chisse , pe cquanto nce ne cape ,

S'enchie ommanco lo stefano. A sto munno
Chi chiù trova a magnà chillo cchiù sape ,

E ssi vierze te mannano a zzefunno.



SONETTO

A TRIVOLO VATTUTO

Siente sto ppoco ; dint' a quarant' anne
Che cco stima, e coscienza aggio servuto ,
Cinco vote lo mpiego aggio perduto ,
E ccinco vote asciuto sò dd'affanne.

Ca nninche mm'ha smicciato into a li scanne
La Providenza è ccorza a ddarme ajuto ;
E a no grado cchiù ncoppa mm'ha sagliuto
Pe mme rifà de li 'nteresse, e danne.

Mo che mme trovo dinto a la vammace ,
E nn'aggio cchiù paura de dieta ,
Vi la sciorte canzirra che mme face!

Mme fa ddestrituì comm' a poveta ,
Mme fa cantà lo requiescà 'npace . . .
So ccose de fà chiaguere nà preta !

NO MUORZO DE SPIEGA

A LI CORIUSI.

Gnorsì, ve lo bboglio dicere, ve ll'aggio da dicere, pecchè sempe è na cosa bbona a ssapè. Li stampature de l'addotte Giornale che se sprub-
becano settimana pe settimana da chillo brav'om-
mo de lo sio D. Pippo Cirella, nninche trase
maggio, comme se scetano l'amice de Gragnano,
se scetano lloro porzì, e tte li bbide jappeche
jappeche assommà'ncasa mia, si non tutte, a lo
mmanco na porzione. Vuje certo mm' addim-
mannate, e che bbonno? Mo ve servo. Vonno
quatto vierze mpacchiate a llengua nosta, pe nne
fà no presiento a lo Princepale lloro, che le ttratta
sempre co'dorgezza, e bbontà. Li poverielle vonno
fà no poco de viento a lo 26 de maggio, juorno de
lo nomme sujo, pe lle dà no nsegnale de rispet-
to, e dde tennerumma. Tutto va buono: e non
se pò negà che chessa sia na bell'azzione. Ma
chi ne pava le ttorze? Smacenatevello. Li mali-
ziuse se songo addonate che io voglio tanto bbene

a D. Pippo , che nne faccio tutta la stima che mmerita , e comm'a rrognuso mme rattano addò mme prode , dice lo mutto. Nconsoguenzia ogn' anno simmo a la stessa canzona. Lo guajo perrò n'è cchisto; è che io non saccio cchiù addò mma-lora sbatte co lo pensiero pe ffà na cosa a cciam-miello. Ssi bbeneditte comprimiente pe nnome so addeventate no vero frusciamiento de capo ; e ssi non ce mische pe ddinto no poco de sauza piccante , sì pperzo. Co ttutto cchesso pe non me n'ascì pe la maglia rotta , mme songo arracco-mannato a la bbon'arma de Cola Capasso, e aggio nchiaccato mo na carta , mo n'auta, co lo riseco de sentirme siscà co le ttofe. Lo cielo mm'ha bo-luto ajutà ! Carcuna de ste composte ha trovata ndurgenza , non mporta che non fosse prena-ria. Perzò lo Tentillo mm'ha puosto ncapo de consegnarve ste treje scevete da lo mazzo. La for-tuna mme scanze da lo guajo de la formicola ,

» che quanne vo morì mette le scelle !

A la razia.

PE LO BELLO NOMME

DE LO SI D. PIPPO CIRELLA

*Quartarole scritte pe ccunto , e pparte de li
stampature suoje.*

Nc'era na vota no demmonio zuoppo
Che pe ll'aria volava comm'a ggrillo ,
E pe tterra correva de galoppo
Li fatte pe ssapè de chisto , e cchillo.

No juorno lo sciancato vè che smacena !
Fa ddeventà le ccase trasparente ,
E ccomme dinto a na lanterna macena
Te mosta li secrete de la ggente.

Don Felì , bella cosa che sarria
Si ncagno de lo soletto taluorno
Dinto a sto pietto , p'arte de maggìa ,
'Tu leggere potisse nchisto juorno !

Vedarrisse che ttante agurie nchietta
 Nce schioppaano da miezo de lo core ,
 Quante sò li sospire che te jetta
 Na fegliola che sta cotta d'ammore.

Ll'uno prega lo Cielo che te faccia
 Mprofecà sempe de salute , e bbene ,
 Co ppace 'ncore , co allerezza nfaccia ,
 E cco le mmano de frellusse chiene.

Ll'auto prega la terra che da nsidìa
 Te libbere de male pavature ,
 E tte faccia campà quanto la mmidia
 Li giornale , le stampe , e le ffigure.

Chisto vorria sentirte strommettato ,
 Comme n'ommo che bale no trasoro ,
 Che a lo fferro , e l'attone into a no sciato
 Na cammisa te fa d'argiento , o d'oro —

Chillo vorria vederte nguarnascione
 Comm'a no Conte che non pensa a guaje
 Schiassejà pe Ttoleto , e lo Grottone
 Co na carrozza a sse' cavalle bbaje.

E cchi fremma e pacienza te desidera ,
 Nè che nfaccia te saglia lo ssenapo ;
 E chi te compiatesce e tte considera
 Pe la rrobba che bbolle int' a ssa capo.

Ma , Don Pì , tu lo core non lo vide ,
 Ll' annevine qua bbota da l' occhiate ;
 Si a cchillo de le flemmene non cride ,
 Cride a nnuje che t' amammo comm' a ppate.

N' avimmo pe scarfarce che sso cippo !
 E nce preme che nterra aggia salute :
 A lo riesto nce pensa San Felippo
 De lo quale aje lo Nomme , e le bbertute.

PE LI STISSE STAMPATURE

S O N E T T O.

Don Felì, tu si guappo, e tte lo pprovo;
Già d'avè fatta na scoperta aje famma,
E ssi a sto passo vottarraje la gamma
Trovarraje nfì lo pilo dint'a l' uovo.

Nchiacche le ccarte co no gnostro nuovo,
E llesto chelle sò scoperte a rramma!
Lo trocchio pe stamparele le cchiamma,
E ffigure majateche le ttrovo.

Gnorsì; sò ccose da restarne ciesso;
M'a la poteca toja co cchiù stopore
Li stampeature tuoje fanno lo stesso.

Chiste che ttanto t'hanno puosto ammore
Senz' ajuto de chimmeco prociesso
S'hanno lo Nomme tujo stampato 'ncore.

PE LA STESSA ACCASIONE PROSSEMA

*Sta canzoncella a nnomme de li solete
stampature.*

Nuje che avimmo pe le nmane
Sempe lettere, e scritte ,
E ffacimmo da vammene
A li figlie de l'Auture :

Non valimmo doje carote ;
Simmo machene che ffanno
Co la forza de le rrote
Tanta cose , e nnò lo ssanno.

Don Filì, che ffà nce vuoje?
Non c'è ssale a la cocozza ;
Nfra de nuje pescà non puoje
Chi n'agurio fà te pozza.

Comm'ascì da chisto ntrico?
Pe sso Nomme accossì bbello
Simmo jute da n'amico
Che ffa vierze a ssosamiello.

Pe sso Nomme affatturato
 Che tenimmo into a lo core
 Da no piezzo già stampato
 A ccarattole d'ammore.

Quatto juorne!... Aspetta, aspetta,
 E nn' è asciuto sto nchiastillo
 Friddo chiù de la sorbetta,
 Sicco peo de no froncillo.

Don Filì, si sto schefice
 Non ce more pe la via,
 Siente chello che te dice
 Co ppacienza, e ccortesìa.

» Pozz' a tte, ma senza pressa,
 Ciente vote tornà Maggio,
 Comme torna a la remessa
 Na carrozza de viaggio!

Pozz' avè salute e bbene
 La Mogliera toja che pensa
 A la casa, e tte mantene
 Le pproviste a la despensa!

Pozz'accunte a la poteca
 T'abbijà la sciorte amica!
 A tte crescere manteca,
 A nnuje crescere fatica!

Puozz'avè l' alletterate
 Che te mpacchiano l'articole,
 Tutte buone e mmassiate
 Pe ffà mmidia a li ridicole.

Puozze vennere giornale
 Sempe a ggente de coscienza,
 Che te pava puntuale,
 E non faccia maje credenza....

E perzò chi saglie e scenne
 Pe spensarle, e ffa la posta,
 Pozz'avè (ca chesto renne)
 Bbone gamme, e faccia tosta.

Quanno po da ccà se parte
 Pe cchell' urdema pazzia,
 Lo Signore pozza farte
 Porzì Santo! E accossì ssia. »

A LO SI D. PIPPO CIRELLA.

Amecone de core.

Non c'è che ddì. A tutto abbesogna avè fortuna a sto munno. Atta de nnico! mme ne venesse una bbona! Siente comm'è bbello sto ppo-co. Io pe mmantenerete na certa parola, mm'era acciso p'ascià no fatto a cciammiello, e credenno d'averce dato de musso, mme mise a mpastà cier-te strusciolate a mmartelluccio. Ncoppa a cche? Ncopp' a la bella rivista che ffice S. M. de li Civiche nuoste; e nce avea poste porzi le pparole doce, e rrosecarelle che lo Rrè lle decette pe far-le fà tanto de core.

Mme ne jeva nzuocolo pe la prejezza. Quando viernadì venette sazio sazio chillo buon om-mo che ba spenzanno le stampe, e co na resella a bbavone mme disse; *è na cosa guappa sta vota*. Nce jetto n' uocchio, e che bbeco? La rivista 'n perzona! Aggio fatto tre asse! Arapo, e

nce trovo appriesso na ciufolejata de l'amico Cesare!... E mmo te l'agliutte a Cesare ! Te ! vè che ll'è asciuto da chella capo!..... E co cche ngegno se so mpizzate dint'a n'affacciata de carta dudece battagliune de Civiche co ttutto lo llario de Palazzo, e le ffraveche spotestate che se lo magnano! Ebbiva Marpica! Ebbiva a llor Signure! Ll'avite fatta da chello che ssite!

Gnorsi; ma io poverommo mo addò sbatto la capo? Comme s'arremedia sto guajo! Io sto faglio de faglio a ppenziere! Se nn'è scolato pe dduje tierze lo zuco de le cchiancarelle!... Tozza nterra; te truove mpegnato? e pe n'avè sso sbreguogno, aje da mpacchià quarch'auta cosella... Lloco te voglio !..... Ntratanto mme metto a sfrenesià co la mente. Vota, revota, piglia, lasa, martella, e nn'è asciuta sta mmesca pesca de Civeca, e Piedegrotta. Ll'aggio moccata a na mogliera arraggiosa che chiajeta co lo marito pe gghi a chella festa, che porzì è na cosa aromatica.

Mme dirraje, tutto va buono... Ma io che nce pitto ste...? Mm' aje na scoppola. Mperrò se sole dicere, che de sto munno fraceto chello nn'aje che ne tire co li diente. Tu che aviste ll'arte de schiaffà dinto a no quatrillo cchiù de semilia perzone, nne può fa n'auto co ddoje sole. Fa ccossi. Miette dinto a no vascio da na banna no ma-

rito schiattuso, sguarrato ncoppa'a na seggia, co na coppola ncapo a ffà lotane, co no sicario mimocca a ffometa, e cco le rrecchie de mercante a schiattà ncuorpo; dall'autra miettece na mogliera nzorfata che tataneja, facenno mille ngestre, e ccacciano fuoco dall'uocchie, comme fosse la servetta de S. Carlino. Pe mmostà che cchiove a zeffunno, miettece no canale che scorre... Scorre dinto a la casa? Tu che ccancaro dice?... Aje raggione... mm'è scappata grossa... E tu miettece qua llampo che se ficca pe la fenesta, qua truono... Nzomma miettece chello che mmalora vuò metterce, e ssi non ce miette niente faje meglio; manco li vierze se cride. Accossì jarrimmo franche de fuorfece.

Ntra de tanto te li mmano pe non ce perde la spesa, e pecchè ne facce ll'uso comeniente.

A CARMENIELLO

*Marito cocciuto , la mogliera pe gghi *
a piedegrotta fa sta sparata.*

Tu vî sto lesena comme mme ngotta !
 Vi quanta collera mme fa piglià !
 Lo preo , lo nfraceto , nè a Piedegrotta
 Lo mala fercola mme vo portà.
 Che s'ha dda dicere mmiez'a sta chiazza ?
 Che s'ha dda dicere ? Lo buò sentì ?
 Ca so n' areteca , na mala razza ,
 Senza na sbrenzola pe ccomparì.
 Nc'aje che responnere ? Chi è mo ? Songh'io
 Che faccio lefreche , ne Carmenie ?
 No : portamence , marito mio ,
 Sso gusto levame ; che mmale nc' è ?
 Chiov' a ddelluvio ? Sì... ma dimane
 Ncielo na macola non ce sarrà :
 Oje non se vedono manco li cane ,
 Dimane Napole se scasarrà.

Saje che speresciono pacchiane, e sdamme,
 Vajasse, e sbriffie co lo bbonè,
 Zetelle, e bbedole, gnovave, e mmamme
 Li brave Civiche pe gghi a bbedè?
 Da copp' a ll' astreche, da li barcune
 Le ggente alluccano... li bbi, li bbi!
 So ttutte dudece li battagliune,
 Songo no spanfio, non c' è cche ddi.
 Chè piezze d' uommene! Quann' abbesogna
 Smargiasse e ttiseche sanne sfilà;
 So mmilitarie nfi dint' all' ogra,
 Nn' hanno la mutria, la nobirtà.
 E ppo va, videle lo juorn' appriesso!
 Chi accatta rennete; chi fa commò;
 Chi caccia fraceto da no prociesso;
 Chi va a la Curia; chi a lo bburò.
 Perzò lo Prencepe ch' è ccorazzone
 Sì spisso nchicchera li bbò tenè;
 E quann' ammarciano, da lo barcone
 Nce piglia sfizio porzì lo Rre.
 Lo Rre ch' è ll' uneco ncopp' a sso tasto,
 Che cchiù d' ogn' auto lo sa toccà;
 Che dde Melizia pò fà lo masto,
 E n' auto Codicio nne pò stampà.
 E io che dda giovane mme songo ausata
 A ssì spettacole la primm' a gghi,

Pozzo ncoscienza stà grà gghiornata
Ncasa restareme p' agnettegghì ?
E avrisse ll'anemo pe sso golio
De farme strujere, ne Carmenie ?
No: portamence, marito mio,
Sì no... capisceme... sò gguaje pe tte !
Tu aje cchiù affecchienza pe li tornise ,
E io mo pe scrupolo te ll'aggio a ddì ;
Vì ca so ggraveda de quatto mise !
E pe ssi Civiche... pozz'abbortì

A GGROLIA E DDEFRISCO DE LL' ANNO SCURZO

NFERTA A RRETOPEDE — CO LA VOCE

NCAPITOLO.

Non pens' a lo Quaranta cchiù nnisciuno ,
 Pocca senza vammana è scapolato
 Ll' Anno mille ottociento quarantuno.

Che munno puorco ! A cchist' appena nato
 Se fanne squase , vruoccole, e mmeneste ,
 E dde chill' auto ognuno s'è scordato.

A cchi è ccaduto non se fanno feste
 Troppo se sa ; ma ll' anno che se vanta
 Manco sapimmo de che ppanno veste.

Finarmente lo povero Quaranta
 A Nnapole corrette de no passo
 Che t' avria fatta ngelosì Talanta.

Isso allummaje li lampejune a grasso
 Pe ffà la notte cammenà sicure
 La ggente ricca , e li crejate a spasso.

Isso mettie li muorte int' a li sciure
 Ntra marmole e ccolonne ; e dde li vive
 Fice agghiustà li pise e le mmesure.

Isso a Ppantane fracete e stantive
 Sborraje la meuza , che là scura gente
 Arredducea chiù bberde de l' aulive.

Isso dette lo taffio a li pezziente ,
 E alluoggio pe lo vierno e ppe la state ,
 Pe non bederle gnettichì de stiente.

Ora comme patea spisso de frate ,
 Pe sfogà la paturnia de sso male
 Se fice allarejà cinco o sè strate.

Ordenaje scapezzarse li canale
 Che ncuollo nce chiovevano a llangella ,
 Spognannoce da capo a li pedale.

E pe ffà sta cetà sempe cchiù bbella ,
 A ccerte ccase nc' appizzaje la jonta ,
 E dde cert' aute ne tagliaje na fella.

Po da na via che non pe tutte sponta
 Portaje quatto Pitture into Palazzo ,
 E lle decette co na mutria pronta :

Figliù , ccà dinto non se pitta a gguazzo ;
 A ffrisco st' otto cammare nce voglio ;
 Mma de rrobba scegliuta da lo mazzo.

Mmar' a buje si no ttecche nce scommoglio
 Che non sia bbello ! Avite a ffarve annore ;
 De ss' opra vosta ha dda parlà lo Foglio.

E Cchiste danno sense a lo colore
 Le mmura defrescajeno de manera
 Che te parlano all' uocchie , ed a lo core.

Po a no Triato pe ddà meglio cera
 Promettette se' premmie a la bravura
 De ll' addotte che benciono a pprimera.

Nfine a lo figlio , ch' è na crejatura ,
 Ntestamiento lassaje comm' a ddeposeto
 La tutela de ll' Arte e la fortuna.

E mmo ched' è ? Jocammo a lo sproposito ?
 Nisciuno cchiù lo nommena e lo scrive ?
 Manco si fosse de casata sposeto !

Guè ! stamm' attiente a n' essere cattive ,
Si no lo Quarantuno pe ddespietto
Nce ammasona de zelle , e ppreventive.

Ment' è l' agurio che mme volle mpietto
Che rricche e bbiecchie ve manteng'allerta ,
E vve faccia fà lardo a lo cozzetto.

Perzò la Musa che n' è bocca aperta ,
E dd' esse bbona femmena s'avanta ,
A ll' Anno nuovo non cacciaje la Nferta,

E ha ffatto sto Pataffio a lo Quaranta.

PARLAMENTO

INFRA LA SI MENECA, E PARMETELLA

ZIA, E NNEPOTI.

Men. Parmetè, bommespro.

Par. Bemmenuta, Gnorazi. Comme state?

Men. Meza scellata. Patesco la ndrigestione. Co
tutto chesso sò scappata no momento da casa,
e tte songo venuta a ttrovà.

Par. Mm' avite fatto piacere.

Men. E mme lo ddice co cchella mutria? Che
rrobbe' è? T'è succiesso qua guajo?

Par. Chiagno la mala sciorta che mm'è ttoccata:

Men. Mala sciorta! E ccomme? Ciccotto è no
marito de zuccaro.

Par. È no marito che mme fa magnà tuosseco.

Men. Nescia me! Tuosseco?

Par. Accossì non fosse!.... Dinto a no mese lo
mala fercola ha cagnato cinco vote patrone.
Li sansare vanno, e bbeneno ca voun'esse pa-

vate. Parlano sparo, mme fanno morì da lo scuorno, e mme mettono co le spalle a lo muro. Stamatina lo birbante pe cchiù accurto, ncagno de fà la spesa, se nn'è ggghiuto a lo campo appriesso a la bbanna. Nn'è stato cacciato da na bbona casa. Lle so ttrasute sette carrine e mmiezo, e lo mpiso nn'ave accattate pastorielle pe lo presebbio.

Men. Ll'aje da compiatì, nenna mia. Ciccotto da cche fuje guaglione tenette la devozione pe lo presebbio.

Par. Gnorazì, la vera devozione è dde fà ll'obbreco suio; de servì co annore e stima chi lle dà ppane; de fà justa la spesa; de non marttrattà la mogliera... E nfradetanto stamatina mm'ave lassata dejuna! (*chiagne*) Dejuna a mme ch'aggio portate da quarantacinco ducate de dota, e no corriero che bbaleva n'auto ttanto! Dejuna!

Men. Povera Parmetella! Tu mme faje sparte lo core!

Par. E sffernesse ccà!

Men. Nc'è dde pevo?

Par. Lo vagabbunno sapite pecchè vò fà lo presebbio? Pe mmità nchella sera non saccio quanta sette pannelle a spasso compagne suoje, pe ffarle fà no scialicquo. Dinto a no vascio,

addò non ce potimmo manco votà; co lo vorzillo asciutto, e cco na mogliera novegna!

Men. Che t'aggio da dì? Tu aje raggione da vennere. Ma pe n'avè tuorto chiude n'uocchio pe cchella sera. Co lo marito non s'ave da piglià preta de ponta. Sibbè fosse n'urzo co la prudenzia se pò fà addeventà pecoriello. Si po lo stuzzече, chillo tanno se mperra, e ppò menà le mmano.

Par. A cchi? Che se nce prova! Mmarisso! lle faccio aunà na misura de diente pe tterra, si mme tocca schitto no dito.

Men. Parmetè, tu mme jescè da lo semmenato. Ncasa de mammata jere na muscella, e mmo te sì ffatta na gatta foresteca.

Par. Vuje porzì mme jate contro?

Men. E tte jarranno contro tutte, pe ssì cattive sintome che ttiene. Che ddiaschece! mariteto avesse acciso a carcuno! Fosse juto scassanno le ccase de notte? O fatte monete fauze? Lo poveriello è ffigliulo, e sse vole spassà. Nchella serata tutte se spassano. Se mpignano lo lietto si accorre, pe se magnà l'anguille, e lo capetone....

Par. E ccà ll'è ccaduto lo ciuccio! Isso ave apizzato l'uocchio ncoppa a sti sciocquaglie de perne che mme sò ccostate stiente e ssudore.

Se li bborria mpignà. Che se mpegna la nasceta soja!

Men. Mantiè, mantiè; vî ca te sî ffatta troppo prodeceta. E ssà che te dico? Sî n'avasce le bbele, tu nce passe no guajo! Po se dice che ll'uommene sò ccattive. Simmo cattive nuje quanno scapolammo la lingua, e tagliammo a ttunno senza misericordia! Io ll'aggio voluto bbene a Ciccotto, e mme despiace de vederlo trattato a sso muodo. T'è mmarito a la fine, e ssi pensa a ffarte spassà...

Par. Lo dengrazio; io non boglio spasse ncredenza.

Men. Embè, scompimmo sto lotano. Nchella sera venarrite a magnà co mmico.

Par. Mo mme pare ch'accommenza a quaglià lo trascurzo.

Men. E nce avrite gusto. Aggio mmitato porzì lo si Mimmo Treppapare.

Par. E cchi è sto si Mimmo?

Men. N'ommo ricco, no correntone, no cuorpo de bon tiempo che te conta no sacco de stropole, e ffattarielle da farte morì da la risa.

Par. E lo canoscite?

Men. Si lo canosco? Abbeta rimpetto a la casa mia. Nce rejalammo. Non me neja maje niente de chello che lle cerco.

Par. E quann'è cchesso, pecchè non lo prejate de farse servì da maritemo? Si è tanto sguazone, se farrà volè bbene... Non ce sarranno quistiune...

Men. Saje ca mm'aje aperta la capo? Gnorsì; nce lo bboglio dì!.. Ma fa na cosa; parlanne tu pure. A tte non dirrà de no.... Ma non lle dì niente de li difiette....

Par. Ve pare? Ne dirraggio tutto lo bbene; ch'è puntuale, fatecatore, la corona de la capo mia..

Men. Accossì va buono. Io spero de nce lo carrejà doce doce, e dde vedè acconciato lo cerviello a mmariteto. Co lo si Mimmo Treppapare trovarrà certo a ffà bbene. Vedraje che ommo coriuso e ppazziariello! Nchella sera mm' ha prommisso de recetà na bbella canzona che s'ave mparata a mmente, ncoppa a la vegilia de Natale, e a la prejezza de lo puopolo...

Par. Chesta ccà mme pejace.

Men. Sentarraje! Quanno la dice te pare de sta a S. Carlino... Ma s'è ffatto tardo, e aggio lassata la casa sola. Abbesogna che mme ne vada.

Par. Iate connìo.

Men. Nfradetanto de lo concierto ch'avimmo fatto, dinne qua pparola a mmariteto...

Par. Gnorsì.

Men. Ma co la bbona maniera.

Par. Gnorsì.

Men. Falle quacche squasillò.

Par. Gnorsì. Ma si non ce riesco, lo manno a bbuje.

Men. Comme te piace. A rrevederce.

Par. Ne, Gnorazì, non sarria meglio che lo presebbio lo facesse pure a la casa vostra? La vosta è cchiù commeta, e ggranne.

Men. Pe ccontentarte farraggio de tutto. Viene tu, mariteto, lo presebbio, li pasture, lo zam-pognaro, li truone....

Par. Che pozzat'esse bbenedetta! ... Zia de sto core!

Accossì finio sto parlamiento a zighezzago: E' pecchè ll' aute che nn' hanno voglia pozzano leggere tale Canzona, la stampo ccà appriesso.

LO SI D. MIMMO TREPPAPERE

PE LO BELLO JUORNO DE LA VEGILIA DE NATALE

ARREMEDIA NNITTO NFATTO STA

COMPOSTA.

Te! che ffolla ccà mmiezo è scapolata!
Non m'allicordo ancora comm'a st'anno
Tanta ggente a rrevuoto pe la strata.

Chiazze e ppoteche sbommecate stanno
De tanta sciorte de provvisiune
Che ll' uocchie nfronte strevellà te fanno.

E pparate de frutte a li pontune,
E mmontagne de vruoccole, e ttorzelle,
E carrette de pigne, e de capune.

Chi s'accatta lasagne e bermicielle;
Chi lardo e nzogna; chi butirro e llatte;
E chi alice, tonnina, e chiapparielle.

Addò stanno a mmontune li piate,
 Addò botteglie, chicchere, e bbicchiere,
 E addò nfì lo premmone pe le ggatte.

Vì llà che t' hanno appiso li chianchiere !
 Pare ll' urdemo juorno che se magna,
 E ncapo non ce stanno aute pensiere.

Chi se mpresta denare, e cchi le ccagna,
 S' asciuttano le ssacche, e li vorzille,
 E po nfaccia a lo pesce è la coccagna.

E ssiente strillà gruosse e ppeccerille:
 Senza li capitune non c' è ffeffa —
 Mo te scioncano nfaccia chest' anguille —

È n' auta rrobba, è n' auta rrobba chesta,
 Nc' aggio data la voce a ssè carrine;
 Magna, ca mme n' annuommene, majesta —

Chist' allucca: patelle, ostreche, angine,
 Mo so asciute da cuorpo a lo Fusaro
 Pe ffarte addecrejà li cannarine —

Chillo: aggio treglie, e cciefare de maro,..
 Tu che nce addure? No ttocchè—Non tocco—
 Si non ce vide miettete l' acchiaro —

Quanto facimmo ? Vi' ca io non so llocco ,
 Dimme lo gghiusto—Embè damme otto penne--
 Te nne do ttrè, va bbuono?-E mmagna stocco-

Vuò trentacinco fante? — Va vattenne—
 Quatto carrine? — E quanno te nne vaje?
 Mo ne votto lo pesce e chi lo bbenne ! —

Vope , mazzune , porpetielle , e rraje —
 Spara n'auto — Mal' uocchio non ce pozza !
 Addorano de scoglie , e sso ppalaje...

Cancaro ! sta pe scennerme la vozza ,
 E mmanco no piatuso aggio pigliato !
 Sarria meglio de vennere cocozza —

Non bottà ; che mmalora sì ccecato ?
 P'accattà quatto scioscele 'ncredenza
 Mm'aje no callo a lo pede scarpesato —

Zitto mo , ca n'è nniente ; agge pacienza —
 Che ppacienza , e ppacienza ? no stivale —
 Vi comm'è ntossecuso sto sfelenza ! —...

Mo lo rociello se fa ggenerale ,
 E ttutte nchietta alluccano le bbuce ,
 Comme fosse concierto de finale —

Signò , sò de Sorriento cheste nnuce —
 Mm'è benuto da Foggia lo crapitto —
 Mostacciuole , acquavita , e ppaste duce —

Sto bbaccalà speresce d'esse fritto —
 Sta cervellata fa leccà le ddeta —
 Magnatella na zuppa de zoffritto —

Cheste non sò ccastagne , sò ccopeta —
 Porta lo sosamiello a gnorazia —
 Caruofane p' aulive de Gajeta —

E San Giuseppe, e Sant' Anastasia —
 Li zampognare cantano, e te fanno
 Assommà dint' a ll' arma n' allegria.

Vegilia de Natale comm' a st' anno
 Che la rrobba nce scarreca a zeffunno
 Tu non la truove si la vaje pescanno.

E ssi chesso n'avimmo a cchisto munno ,
 Voglio magnà pe cquatto, e po de vino
 Doje tre llampe asciuttarme nzi a lo funno.

Voglio sparà li truone a lo Bammino ,
 E quann'è meza notte vasà nterra ,
 E po ronfà diece ore a ssuonno chino.

Pe ddiggerì la meuza , e ffà la guerra
Dimane a na gallotta , e a no capone
Co cquatto mozzarelle de la Cerra...

Vì che te face la devozione!

PE LO NOMME

DE LA SIGNORA D. MARIANNINA

SONETTO.

Lo ppenso, te lo ddico, e nce scommetto
 Mariannì, sarraje sempe affortunata;
 No sisco che mme ntrona int'a lo pietto
 Mme lo bbà rebbrecanno sta jornata.

Saje sto sisco ched'è? N'agurio schietto
 De farte mprofecà comm'a na fata;
 E ppe cchesso no muorzo de sonetto
 Te manno int'a sta carta ammollicata (1).

Tu sì na pempenella de vertute,
 Perzò lo Cielo suppreco ogne ghiuorno
 Pecchè sempe te dia bbene, e ssalute.

Ma quanno chillo de sso Nomme vene,
 Pe lle fà no squasillo de retuorno
 Lo prego che te dia salute, e bbene.

(1) Ndorata a ddesigno.

*P' annore , e grolia de' li premmune de cierte
strillazzare Iocature de Scopone*

STO QUATTUORDECE A LA NTRASATTA.

Siente : ogne nsera'ncasa de Sciascione
Se vanno cierte amice a ppiglià spasso ;
E ntra chille che ghiocano a scopone
Chi canta da soprano , e cchi da bbasso.

Nninche se pesca quarche ffarfallone ,
E se perde no seje , no sette , o n'asso ,
Strillano nfrotta pe se fà raggione
Comm'a Giudeje denanze a Ccaïfasso.

Ma cresciono le ddoglie , sì qua ssera
Nce assomma lo Tressette a mmediatore ,
E le Ssignore jocano a pprimera.

Tanno po , sì nce ncappe , sì perduto !
Mmiezo a ccierte quartette co li Core
Si no nzordisce , appiennete pe bbuto.

*A D. Ciccotto Coniglia che s'ha boluto piglià
fastidio de responnere a lo Sonettiello arrozzuto
puosto cca nnanze, p'ave scritto: canta
da Soprano*

ST' AUTO QUATTUORDECE.

P'ogni dditto nce cape la resposta,
Comme lo ssale dint'a la menesta:
Perzò vanno le llettere a la Posta,
E sta la nnammorata a la fenesta.

Nuje responce solimmo co la gnosta
Si nce scrive l'accunto, o la majesta,
E llavammo la capo a llengua nosta
A cchi nce parla sparo, e mmagna agresta.

Ma pecchè Don Ciccotto s'è ngrifato,
Ed è ccurzo a rresponnerme'n Prannaso,
Mente io non l'aggio manco annommenato?

Pecchè? Pe ddirme che ha no gruosso naso?
Ma co ssa prova niente mm'ha provato,
Potea la Gnora averlo fatto a ccase!

SONETTO.

*A rriepeto vattuto pe la jettatura che ha Micco
Zeppa de perdere a lo Scopone fitto fitto
ogne nsera.*

Che sciorta cana! È quanto se pò ddicere,
Ogne nsera aggio a pperde a lo scopone!
E ccà nisciuno mme pò contradicere
Che sparto a ttutte la devozione.

Besogna che mme faccia bbenedicere
Pe mme levà da tuorno qua stregone;
Si no, sibbè jocasse a ffave, e ccicere
Farria quant'a na volte lo premmone.

E comme? Perdo co cchi mm'è ccompagno!
Perde co cchi vinceva!.. E mme succede
Nfì le ppartite a pperdere pe scagno! (1)

Iusto quanno de vincere aggio fede
S'ha dda fà na spilata a lo tompagno!
Che mmannaggia lo juoco, e cchi nce crede!

(1) *Se ntenne da no scopatore che se fice piglià na mano da
n'auto, pe ccierte fine suoje, e Micco nce perdio no volo.*

PE LO NOMME DE LA MAMMA SOJA

No peccerillo fa chisto compriminto.

Mamma bella , pe le ccase
Chi la cerca , chi la chiamma ,
Nò la trova n' autà mamma
Nzuccarata comm' a tte.

Si mme parle, e ddaje no vaso
Quanno torno da la scola ,
E lo vaso , e la parola
Sò bbarattole pe mme.

Schitto faje la faccia amara
Si faccio io qua mpertenenza ;
Siente mo pe ppenitenza
Che pensaje sto Juorno fà.

Pe te fà la vocca doce
Quanno ncollera te miette ,
Sto cartoccio de confiette
Io te porto a rrejalà.

Sto regalo n' è 'ndescreto
E tte dico lo pecchè ;
Nc'è ccà ddinto no secreto.
Annevina mo che d'è?

Songo ciente , senza storno ,
Sti confiette , e bbonno dì ,
Che pe tte stò bello Juorno
Ciente vote ha dda vení.

LA JETTATURA

N CAPITOLO.

Che mme ntrevene! Pe no capitale
 De seciente ducate, io gnettecuto
 Mme sò quattuordece anne ntribunale.

Ma nfine chisto chiaïto s'è bbinciuto!
 Fatta na casa tricche tracche a pparte,
 No quartino pe spropeta aggio avuto.

Sto quartino sta sotto ad aute quarte,
 E nn'affaccia a la via!... Co tutto chesso
 Ne rellejo comm' a ccuonsolo de ll' arte.

A mmalappena ne pigliaje possesso
 La casa ncoppa fece lesejone,
 E accommezaje da capo no prociesso.

Pe le pperizie, e pe mme fà raggione
 Sto spennenno lo tuppo; e lo nquilino
 Pe gghionta mm' ha truffato lo pesone.

Ll'affitto a mmese , pe cagnà cammino ,
 Ad una che ggiranno pe le strate ,
 Venne tele de cannovò, e dde lino.

De grana fauze , e prubbeche cecate ,
 De carrinielle, e dde tarì de scarto ,
 Nn'aggio a stiento siggiute doje mesate.

Ma stammatina all'unnece e no quarto
 Essa mme dice: io vengo a ffà n' accusa
 A lo patrone de lo primmo quarto.

Chisto ha rrente la mia na stanza nchiusa
 Pe ddò non passa na pagliuca d'aria,
 E ssiente che mm'ha ffatto co ssa scusa!

Co ttutto ch'ogne legge ll'è contraria,
 Aperta , addove figliama se corca ,
 Mm'ha na fenesta quatto parme laria.

Nuje ccà ddò stammo? Ntra la ggente torca ?
 A mme se fanno nfaccia chiste taglie ?
 Io nce voglio fà mettere la forza ! =

Storduto , e fatto verde comm'a ll'aglie,
 Lle dico : t'aje nsonnata ssa fenesta?
 Sto caso non se dà ; vì ca tu sbaglie. =

Uh ! faccia mia ! Ve pare vocca chesta ,
 De ve dì na buscia ? Da ll' apertura
 Nce trase na fometa che t' appesta .

Manco si fosse stata sebetura =
 E ttu jere nzorduta de manera ,
 Da non sentirte sfravecà le mmura ? =

Ma ncasa io non ce resto a mmonnà pera ;
 Vado sperta lo juorno , e non me nzerro
 Co la povera figlia che dde sera .

E dde juorno chell'anema de fierro
 Nsaponata de trappole e dde nganne ,
 De juorno t' ave fatto chisto perro .

Io pe mme , mme ne scotolo li panne ,
 A bbuje tocca de farme n' auto affitto ,
 E dde pavarme li nteresse , e danne .

Si no , nc'è la jostizia = E statte zitto ;
 Tu vè che mo no panteco mm' afferra ,
 E bbuoje stare a zucarne fitto fitto !

Damme tempo a sbrogliarme da sta guerra =
 Vuje sentì non bolite ? = T'aggio ntesa =
 Io ddò dormo stanotte ? = Duorme nterra =

Nchesto mm'assomma na sentenza a scesa
Che, p'agghiustà la meuza a lo palazzo,
Mme condanna a lo tierzo de la spesa.

Io non ce vedo cchiù; comm'a no pazzo
Mme jetto pe le ggrade, e ppiglio lario
Pe ddiggerì l'arraggia, e lo strapazzo.

Mo co lo tierzo, e la fenesta sbario,
Mo co lo tiempo pe trovà jostizia....
Atta d'aguanno! ll'esse propietario,

E ppatrone de na casa, è na delizia!

NO FATTARIELLO.

Pe bberetà Donna Marta Serpetiello è na femmena veramente comprita. È ssempe affabbile e ccerimmoniosa co ttutte. Vo bbene a lo marito; abbada a ll'affare de casa, e ssibbè non sia tanto ricca, ave assaje caretà co lo prossemo. Uno vizio tene. È ccecata d'ammore pe lo figlio Vicienziello; se lo schiude coll'uocchie, e mmaro a cchillo che lle tenesse mente stuorto schitto. Addeventa na vufera. Pe nfì a la scola no bò che se lle facesse no scuorno, faccia o non faccia mpertinenza, se mpare, o non se mpare la lezione. Vide mo ch' ha dda fà no povero masto co no preventivo de chiste! O s'ha dda nfracetà li premmune, o non ll'ave d'azzettà! E ssi lo masto pe non perde l'accunto l'azzetta, vi che arucolillo po te caccia da lo Stituto.

Pe bbona sciorte Vicinziello n'era de mala petena, e tteneva no core de zucchero. Sudava gnosta ncopp' a li libbre; se steva ciunco ncoppa li scanne; n'attaccava lite co li compagne; e aveva

isso pure compassione de li povere. Ora ll' autasera tornaje da la scola co na faccia scura, e ngottatiello no poco, comme si avesse abbuscato. Donna Marta nninche se n'addonaje, non ce vedde cchiù. S' allommaje comm'a zzurfo, e bboleva paglia pe cciente cavalle. Pe ccaso io mme nce trovaje mmiezo, lle spezzaje parlamiento, e ffigge de tutto pe lle levà da vocca lo ffraceto. Vi comme vanno le ccose! Vicinziello aveva fatta na bbella azzejone, e steva ntofato pe la ragione... Ma si ve la dico mo, appriesso non ce avrite cchiù ggusto. V'avasta sapè che quanno la mamma vedde lo rancio ch'avea pigliato, ascette fora de li panne pe la prejezza, s'abbracciaje lo figlio, lle fice tanta vruoccole, e gnuoccole, e addeventaje na pecora. A cchella scena mme venne all' uocchie na lacrimazione, e ncapo lo pensiero de scriverla, e ll'aggio scritta.

Leggitevella, Signure mieje, e bbedarrite, che ssi avimmo defiette, la bontà de lo core se lli ssorchia, e le ffà scomparì nnitto nfatto.

DUETTO

NTRA D. MARTA , E LO FIGLIO SUJO VICENZIELLO.

*Vicenziello.*Mamma cara , bbona sera. (*affritto*)*Marta.*Bona sera , Vicinziè. (*lo smiccia*)

Ne , tu mm' aje na mala cera ,

Che te siente ? che robb' è ?

Vicenziello.

Niente , mamma...

Marta.

Tu mme nganne ,

Tu mme dice la bboscìa.

Vicenziello.

Io ngannare a minamma mia !
Non pensarlo, no lo ddi.

Marta.

Ll' uocchie russe ancora tiene ,
Aje na faccia de dejuno. . .
Contamello , t' ha quarcuno
Fatto chiagnere ?

Vicenziello.

Gnorsì.

Marta.

Farte chiagnere ! oh ! mmarrisso (*nzorfata*)
Chi t' ha ddetta qua pparola !
Faccio nascere n' aggrisso
Crammatina into a la scola.
Sò mogliera a Don Fenuccio
Che na vota fuje paglietta ,
E nzì a ncoppa a lo denucchio
Mo mme stiro la cazetta ;

Non so flemmena de strata
 E tte pozzo vennecà.
 Quanno pavo la mesata
 T' hanno tutte a rrespettà.

Vicenziello.

Mamma mia , tu piglie arrore ;
 A mme tutte da lo masto
 Vonno bbene co lo core ;
 Non toccarme cchiù sso tasto ,
 La Iostizia non lo bò.

Marta.

La Iostizia !... E quanno è cchesso
 Non fà starme cchiù npensiero ,
 Mm' aje da dì che t' è socciesso ,
 Mo lo fatto vero... vero ,
 Senza ntapeche . . .

Vicenziello.

Gnernò.

A la via de ll' Arenaccia
 Io ncontraje na peccerella.
 Tutta nfosa , e cco la faccia
 Che pparea na mortecella.

Era jùta int' a la lava
 Co scognarese tre diente,
 E cchiagnenno addimannava
 Na lemmosena a la ggente
 Pe se fà lo ppane cuotto;
 M' ave fatto ntenerì
 Nfino a chiagnere, e dde bbotto
 Ll' aggio dato no tari.

Marta.

Che puozz' esse bbeneditto
 Figlio caro, figlio bbello!
 Tu de st' arma sì la gioja;
 Aje no core teneriello
 Tale e cquale a mmamma toja,
 Che a lo prossemo te fa
 Sempe sempe caretà!...
 Ma pecchè staje tanto affritto?

Vicenziello.

Ca da trenta e cchiù mmatine
 Io da coppa a la marena
 Mm' acchiettaje ssi duje carrine,
 E l' affare è asciuto a bbrenna;
 Nne voleva accattà truone

Pe la notte de natale
 Co la bbella ntenzione
 De spararle , e mme spassà.
 Mo non tengo manco sale...

Marta.

Statte zitto : nchella notte
 Te darraggio no ducato ,
 Voglio farte sparà bbotte
 Da stordì lo vecenato.

Vicenziello.

Ntra le mmamme veramente
 Non c'è mmamma comin'a tte. (*l'abbraccia.*)

Marta.

a 2. { Mperrò statte alleramente ,
 E rrespunne appriesso a mme.

Vicenziello.

Gnorsi , stongo alleramente ,
 E rresponno appriesso a tte.

A duje.

Comm' a lo spirito
 Che nce dà bita ;

Comm'a lo barzamo

Pe la ferita ,

È de lo prossemo

La caretà.

Lo Cielo mprofeca

Chi è dde bon core ,

Chi stoja le llacreme

De lo dolore. . .

Chesta è la renneta

De la Pietà.

364651







BIBLIOTECA

FC
D